

Xujun xi tjit'a ni xi y'ejña chji Jesucristo nga kama

B'i ts'in b'aha ra xujun

1 Jesucristo y'ejña chji ni xi tjit'a xujun xu'bi. Ntiana kits'inkjas'ehen tu xi kui kujña chjih ra xuta xi ts'e ni xi tjihin nga kama xati. Kits'in niba ntitsjehe tu xi kuakuchjih ra ni Jua, kui xi nda musuhu. **2**Ei titsuya Jua ni xi kama chjih, kui niu xi ehen Ntiana ko ni xi kitsuya Jesucristo.

3A b'a nda tjihin ts'e xi ts'inyaha en xu'bi xi kits'in niba Ntiana, ko a b'a nda tjihin ts'e xi basinjuhu ra ko ts'insihin ra ni xi tjit'aha ei, at'aha ja tifi tina nistjun!

B'i ts'in kits'inkjih Jua kjuasuniña xuta ninku

4An Jua tits'inkjnuu xujun, ninku yatu xi tintsuoo ante Asia. Katsjanuu kjuanda ko kjuajyu Ntiana xi tjina, y'ejña ko kjuai. Katsjanuu kjuanda ko kjuajyu espiritu xi yatu incha maha xi tjin nginkun ma b'ejña Ntiana nga batexuma. **5**Katsjanuu kjuanda ko kjuajyu Jesucristo xi titsuya ni xi ts'e Ntiana. Kui xi tjun j'ayaha ajihin xuta k'ien ko batexumaha ja rei xi tjin asuntee. Kui xi tjoho na ko tsatendzjo njihi nga kits'inkjejni ngatitsunná. **6**Kits'in mana xuta xi ts'e tu xi kuatexumahaná ko n'etsjooho Ntaha ko Na'mih xi nkúhu ja na'mi xi ts'e. jKas'ehe kjuachanka ko katatexuma santaha tu nkjehé ni! B'a katuma.

7Chasoo, kui xi nibajin nintiu! Ngayjee xuta skuehe, santaha ko ja xi kik'ienjinkih kicha. Kjinta nkjun ngayjee xuta naxinantá xi tjin asuntee nk'ie nga skuehe. Jhon, b'a katuma.

8"An xi xi tjuhun ko xi fekuhu", titsu Ntiana xi tjihin nga'yun, xi tjina, y'ejña ko kjuai.

B'i ts'in tsakuchji yjoho Jesu

9An nda nts'o Jua ta tif'ajian kju'un xi tincha bitjajun. Jun ko an Ntiana tibatexumaná. Jun ko an tin'e chukjua kjuanima nga nkúhu makaá Jesu. Tsatejnanije xjo xi 'mi Patmo at'aha y'enijmía ehen Ntiana ko kits'inkie yjona nga Jesu tjennkia. **10**Nku tuminku

j'aijínna Espirituhu Ntíaná ko astán kint'e nga nibaha nku ntá xi tū xí 'yúhún jane, xi nkú joyaha nku tjio. ¹¹B'a kitsúna:

—T'et'a xujuin ni xi chái ko n'ekjíhi ninku yatu xi tjin ante Asia, ninku xi tijná nanki Efeso, xi tijná nanki Esmirna, xi tijná nanki Pergamo, xi tijná nanki Tiatira, xi tijná nanki Sardi, xi tijná nanki Filadelfia, ko xi tijná nanki Laodicea.

¹²As'ai kits'ink'ótjiya tū xi skuehena yá xi tínchjakona. Nk'ie nga kits'ink'ótjiya, kieke yatu ni toonsine xi s'entusún nd'í xi ts'ín ndzjen. ¹³Ajihin nd'í xi ts'ín ndzjeen kieke xi b'a tjin Ntíhi Ndax'iun tjin. Nku najyun ndju yja xi bichú santaha tsuku ko nku ni toonsine tjíkjá 'mehe. ¹⁴Taba ntsjahá xi nkú joyaha ntsjahá chutsanká ko xi nkú joyaha nch'án. B'a k'un tunkun xi nkú joyaha nd'í.

¹⁵Tíbat'ai tsuku xi nkú joyaha kichá sine bronçe xi kin'e'na nga kin'echuhun. Tū xí 'yún ntahá, xi nkú joyaha xi nkú ts'ín faneya ntáje nga 'yún xu. ¹⁶Ntsja kixi tjit'ahá yatu niñu ko ts'a tsitjuhu nku kichá ndju ntsí xi yjo nga jo ngaba. B'a tjin ankjín xi nkú joyaha ts'íu nga 'yún bat'ai.

¹⁷Nk'ie nga kieke, jáikijne kinte tsuku ko b'a kama xi tsaya kama. Tungá jánehéna ntsja kixi ko b'i kitsúna:

—Najmi tū binkjuin. An xi tjuhun ko xi fekuhu ¹⁸ko xi tijná tík'un. Tsaya tunga nd'ai tijná tík'an tū nkjéhé ni. An tijnána yubihí ngabayoo ko antehe xuta k'ien. ¹⁹T'et'ai ni xi kuayai, ni xi tíma nd'ai ko ni xi kama askahan. ²⁰B'i tsuhu ra ni xi tijná 'ma xi kuayai, niñu xi yatu xi kuayai ntsá kixiá ko ni toonsine yatu xi s'entusún nd'í xi ts'ín ndzjeen. Niñu xi yatuu, kui xi ntítsje xi basehe ninku xi yatuu. Ko ni xi s'entusún nd'í xi ts'ín ndzjen xi yatuu, kui xi ninku xi yatuu.

B'i tsu én xi kits'inkjihí Jesucristo ninku xi tijná nanki Efeso

2 'B'i ts'ín t'et'ai nga n'entúhi ntítsjehe xuta ninku Efeso: “B'i títsu xi tjit'ahá niñu xi yatuu ntsja kixi, xi sú'bajin kamasehen ni toonsine xi yatu xi s'entusún nd'í xi ts'ín ndzjeen: ²Be ni xi t'n'ei, xi nkú ts'ín t'ib'enki kjuanimá xá xi t'n'ei ko xi nkú ts'ín t'n'e chúkjuai. Be nk'ie nga najmi sasíhin ni xi incha ts'ín já ch'onk'uun. Kichjut'ayák'uin já xi já postru t'incha ts'ín ma maña yjoho ko kiyai nga já tsank'á niu, nga najmi já postru. ³Tín'etsentai kjuanimá xi t'íbitjajín ko t'n'e chúkjuai kjuanimá xi tísakúhi ngat'ana. Najmi tífehe tak'uin.

⁴Tungá najmi tísasíhinna ngat'a ts'i nga najmi tá t'jihin ri kjuatjo xi kis'ejñahi nga tjuhun. ⁵Kui nga n'ekj'áítsjehenni ni xi ja kin'e t'axín. T'inchj'ahá ri animahí ko n'e ngáhani xi nkú kin'ei nga tjuhun. At'ahá tsa najmi b'a n'ei, kjúáisehe ko kjexián ni xi síjnasun nd'í xi ts'ín ndzjen xi ts'i má nga tijná. B'a ts'ian tsa najmi k'úin'chj'ahá ri animahí.

6'Nda tjin nga najmi sasihin já nicolaíta. An ta najmi sasinna jóo.

7'Xi tjen tjabaxínju katasínju ni xi títsuhu Espiritu xuta ninku! Xi ts'ín ngana, kui xi tsjaha nga kjine tuhu yá xi ts'ínk'iéntu tík'uhun xuta, xi sjña ndjiojmihí Ntíaná."

**B'i tsu én xi kits'ínkjihí Jesucristo
ninku xi tijná nanki Esmirna**

8'B'i ts'ín t'et'ai nga n'entúhí ntítsjehe xuta ninku Esmirna: "B'i títsu xi tjuun kō xi fekuu, xi k'ien kō xi tijná tík'un ngáha: 9'Be nga tíyai kju'a'un kō nga x'áin, tunga nk'ie nga basehe, nchiná ní. Be nga tínchjatit'aihin xuta xi ntje judio tíncha ts'ín ma maña yjoho. Najmi xuta judio niu. Xuta xi yjanki níhí ndanindoo niu. 10'Najmi tu binkjuin kjuanima xi kuitjánki. At'aha k'ua xuta xi ts'ajun ts'ínkjas'en nubayá ndanindoo tu xi chjút'ayák'uhunnuu. Te nistjin tjihin nga sakúnuu kju'a'un. Ndjá tisinjñái ndaha tsa tjihin nga kuayái, kō an tsjaha corona xi k'uaqihí xuta xi k'úéntu tík'uun.

11'Xi tjen tjabaxínju katasínju ni xi títsuhu Espiritu xuta ninku! Xi ts'ín ngana, kui xi najmi ta skuehe ngabaya xi ma joo."

**B'i tsu én xi kits'ínkjihí Jesucristo
ninku xi tijná nanki Pergamo**

12'B'i ts'ín t'et'ai nga n'entúhí ntítsjehe xuta ninku Pergamo: "B'i títsu xi tijnaha kicha ndju ntsí xi yjo nga jo ngaba: 13'Be ni xi tín'ei kō nga má tijná ndanindoo nga tibatéxuma tinchin. Tu nkú kixihí tisinjñái kō tu nkú ts'ejihín ri an, b'aha ra nistjin nga kin'ek'ien nda musuna Antipa xi y'énijmína. Kin'ek'ien ajinnuu má nga tijná ndanindoo.

14'Tunga tjihín ni xi najmi tísasinna xi tín'ei. At'aha tjintujihin k'ua xi tíncha ts'ín ni xi tsakúya nda profeta Balaam. Kui tsinchá'a nda rej Balac xi nkú ts'ín kama ts'ínkijnejihin ngatitsun xuta xi ntje Israel tjeheh ra, tu xi incha kjinehe chje xi kik'áihí ra ntia xi ts'índaha ntsja xuta kō tu xi chuba incha kjúántukoho xinkjín. 15'Kō ta tjintujihin k'ua xi tíncha títs'ín sa ni xi bakúya já nicolaíta. 16'Kui b'a maha, t'inchj'aha ri animahí. Tsa najmi b'a n'ei, kjúáise xatfhi kō kicha xi tíbitjuhu tsu'bá kjankohona xuta xi b'a tijncha ts'íun.

17'Xi tjen tjabaxínju katasínju ni xi títsuhu Espiritu xuta ninku! Xi ts'ín ngana, kui xi tsjaha nga kjine manaqa^a xi tijná 'ma, kō ta tsjaha nku ndjio taba má nga tjít'a nku j'áin tsetse xi najmi ch'a be. Tu nkuhú xi ts'ínkjáhín, kui xi skue."

^a 2:17 "Manaq" 'mi nichine xi kik'áihí xuta Israel nga kjine nk'ie nga incha y'emako Moise ante kixiu.

**B'i tsu én xi kits'ínkjihi Jesucristo
ninku xi tijná nanki Tiatira**

¹⁸B'i ts'ín t'et'ai nga n'entúhi ntítsjehe xuta ninku Tiatira: “B'i títu Ntíhi Ntíaná, xi b'a k'un tunkun xi nkú joyaha nd'í ko tsuku xi nkú joyaha kichá sine bronçe xi kin'e'na nga kin'echuhun: ¹⁹Be ni xi t'n'ei, nga tjohi ko s'ejihin an, nga t'n'exát'aní ko xi nkú n'e t'n'e chúkjuai. Be nga 'yún t'n'exá sai nd'ai nk'ie nga tuts'ihin ni.

²⁰Tunga kuihi ni xu'bi xi najmi tísasínna nga t'n'ei. Tí'baqinteihí na Jezabel xi na profeta tít'sín ma maña yjoho. Tíbakúyaha ko t'ib'anachaha xuta xi ts'an, tu xi chuba incha kjuántukohó xinkjín ko incha kjine chje xi kik'aihi ntia xi ts'índaha ntsja xuta. ²¹Kitsjantéhe no nga ngjuai'k'áha ra animaha tunga tu nkú mjehé ra chuba kjuántukohó já. ²²Kui nga nku ch'in ts'ín nibánehe no ko chánka kjuanima xi tsjaha já xi fantukoho, tsa najmi incha ngjuai'k'áha ra animaha nga incha k'uéntu ni xi tsakúyaha no. ²³Ts'ink'ién ntíhi no. B'a ts'ín skuehe ngayjee xuta ninku nga be xi nkú ts'ín tjíntuyá kjuankjintak'uhun xuta ko animaha ko nga tsjanuu nga nkúnkú chjhi ni xi kin'o.

²⁴Máha jun xi tintsuboo Tiatira xi najmi t'n'o ni xi t'ibakúya no ko najmi tsinchiyó ni xi tsu xuta nga t'íhín ndanindoo, ni xi tjíntu'má, b'a t'ixinnuu nga najmi ta tsjahanuu kj'ai ch'á. ²⁵Tunga chuhún ruu ni xi tijnanuu santa nkúhu nga kjuái ngáhana.

²⁶Xi ts'ín ngana ko tu nku ngjuaindjukohó xá xi mjena nga ts'ín, kui xi tsja xaha nga kuatéxumaha nanki xi t'ín asuntee xi nkú ts'ín kitsjá xána Na'mina. ²⁷Ndjá kuatéxumaha xuta. B'a kamaha xuta xi nkú mahá nku ndjii nga kichá bich'onnehe. ²⁸Xi ts'ín ngana, kui xi tsjaha niñu xi bat'ai nga ja t'ífi ma sen.

²⁹Xi t'jen tjabaxínñju katasínñju ni xi títshu Espiritu xuta ninku!”

**B'i tsu én xi kits'ínkjihi Jesucristo
ninku xi tijná nanki Sardi**

3 'B'i ts'ín t'et'ai nga n'entúhi ntítsjehe xuta ninku Sardi: “B'i títu xi tijnaha espiritu yatu xi ts'e Ntíaná ko niñu xi yatuu: Be ni xi t'n'ei. B'a incha tsu xuta nga tinchun t'ík'uin, tunga nk'ie nga basehe ja tsayai. ²Tinchin ndai ko t'jen nga'yíhín yjohi kintehe ni nga kuayá kjin. At'aha t'íbe nga najmi kixi t'ímikoi xáhi nginkun Ntíaná.

³Kui nga n'ekj'áítsjehen ri yjohi ko tsjénki ni xi kik'aihi ko kinu'yái, ko t'inchj'aha ri animahi. Tsa najmi kuinchinndai, kjuáisehe xi nkú joyaha nku nda ndyjé ko najmi chai mí chubaha nga kjuáisehe. ⁴Tunga tjíntujhín ri nanki Sardi k'ua xuta xi najmi incha kits'ín chuntí najyuhun. Kui xi k'uémakona nga ngjuá najyun taba, at'aha kui xi incha t'jehen ra nga k'uémakona.

⁵Xi ts'ín ngana, kui xi n'engja najyun taba ko najmi ts'in ndyjájna j'áihin xujun má nga tjíntut'á j'áihin xuta xi k'úentu tík'un. Tu sa ní ts'inkíe yjona nga be xuta xu'bo nginkun Na'mina ko nginkun ntítsjehe.

⁶Xi tjen tjabaxínñju katasínñju ni xi títsuhu Espiritu xuta ninku!”

**B'i tsu én xi kits'ínkjihí Jesucristo
ninku xi tijná nanki Filadelfia**

⁷B'i ts'ín t'et'ai nga n'entúhí ntítsjehe xuta ninku Filadelfia: “B'i títsu xi tsje ko naxu ni xi tsu, xi tijnaha yubihí nda rei David, xi kjex'á ko najmi ch'a maha b'échja, xi b'échja ko najmi ch'a maha kjex'á: ⁸Be ni xi t'n'ei. Chasei. Nginkuin tjentixana nku ankuja xi najmi ch'a maha b'échja. Be nga najmi 'yún tjihin nga'yún, tunga t'n'etjusunní éna ko t'n'ekiei yjohi nga yaní. ⁹Nd'ai ni xi ts'ihin xuta sinagogaha ndanindoo, xuta tsank'á xi ntje judio tjehe n ra ts'ín ma maña yjoho, ts'in kjua'yúhún ra nga incha ngjuaisinkúnch'int'ahi tu xi b'a ts'ín incha skuehe nga tjona ji.

¹⁰Kich'atjói éna nga kin'e chúkjuai. Kui nga an ts'inkja t'axíhin ra kjuanima xi kjuai nistjin nga chjút'ayák'un ngayjee xuta xi tjin asuntee, kjuanima xi kjuai nga ngúsuhún asuntee. ¹¹Kjúái xatía. Ndjá tšinjñajin ni xi tijnahi, tu xi najmi ch'a kjé'aha ri corona xi ts'i.

¹²Xi ts'ín ngana, kui xi ts'in ma yásjaihi ninkuhu Ntiana. Ndahachí najmi ta kuitjunkihi yo. Ko k'uet'áha j'áihin Ntiana ko j'áihin naxinantáha Ntiana, kui xi nanki Jerusalem tsetse xi Ntiana ts'ín nibájehe ndjiojmi ján. Ko ta k'uet'áha j'áin tsetsena.

¹³Xi tjen tjabaxínñju katasínñju ni xi títsuhu Espiritu xuta ninku!”

**B'i tsu én xi kits'ínkjihí Jesucristo
ninku xi tijná nanki Laodicea**

¹⁴B'i ts'ín t'et'ai nga n'entúhí ntítsjehe xuta ninku Laodicea: “B'i títsu xi 'mi Xi Naxu, xi ma n'e s'ejihín ni xi tsuya ko xi naxu ni xi tsu, xi kits'ínndako Ntiana ni xi tjin: ¹⁵Be ni xi t'n'ei. Ji xi nkú joyaha ntánijua xi ndaha najmi nch'án ko ta ndaha najmi sje. Tsa tu nch'áhan mahani kai, ko tsa tu sje mahani kai! ¹⁶Tunga suk'ienní. Najmi nch'áin ko ta ndaha najmi sjei. Kui nga kuatetéhera. ¹⁷At'aha: An xi nchíná. Nda ts'ín tijná. Najmi chumi nihi xi ndyjat'ana, tábixín. Tunga najmi tímankjihín ri nga najmi tjihin kjuatsjo, ko nga najmi chumi ni chjhi ra ji, ko nga x'ain ko kai ko kisusti.

¹⁸Kui nga b'a tíxihin ra nga ch'atsehe ni xi tjinna. Ch'atsei toonsine xi 'yún nda, tu xi kama nchínáhani. Ch'atsei najyun taba xi kamandyjai tu xi k'úe'mahani yjoninte kistihí xi títsjáhi kjuasuba. Ch'atsei ntánki xi ts'ínnkihí tunkuini tu xi chahani.

¹⁹Ngayjee xi tjona, kui xi si nchjaka ko tsjaníyáha. Kui nga tjen nga'yúhun ri yjohi ko t'inchj'aha ri animahi. ²⁰Chasei. An síjña asti ankujo nga títs'inkjane. Tsa tjin xi kuint'é ntana ko kjéx'á ankujo, an kjuas'en má tijn ko an kjinéka nichine ko kui kjinékona.

²¹Xi ts'ín ngana, kui xi tsjantéhe nga k'úejñat'akona má nga batexuma xi nkú ts'in an ja kits'in ngana ko tíjñat'aka Na'mina má nga batéxuma.

²²Xi tjen tjabaxínñju katasínñju ni xi títsuhú Espiritu xuta ninku!"

B'i ts'ín tsakuchjíhi Jua xi nkú ts'ín kin'etsjoho Ntíaná ndjiojmi ján

4 Askahan nga ja j'a ni xu'bi, as'ai tsase ko kieke nku ankujo xi tjentixa nk'a ján. Ko nta xi tjun kint'e, xi b'a ts'ín nu'yá xi nkú joyaha nga fane tjio, kui xi b'a kitsúna:

—Nibánji ei. Kuakuchjíhi ni xi tjinin nga kama.

²Ta kuihi chubo j'aijínna Espiritu ko kieke ndjiojmi ján xi kab'ejña nga tíbatéxuma. ³Sénnistjihin xi kab'ejña yo, kui xi b'a tjin xi nkú joyaha ndjio tsjo k'un jaspe ko ndjio tsjo k'un kornalina. Ko sínkjántjaihi má kab'ejña nku yejña xi tíbat'ai xi nkú joyaha ndjio tsjo k'un esmeralda. ⁴Ko andaihi má kab'ejña kieke sa kan ñju jáchá xi ta incha kab'entu, xi incha yja najyun taba ko corona toonsine tjintu'áha.

⁵Má kab'ejña xi tíbatéxumoo tsitju nd'ich'on ko nta xi xáahan kinu'yá ko janeya ch'on. Ko ankjín xi tíbatéxumoo títi yatu nd'í s'ekuyá. Kui xi tsuhú ra espíritu xi yatuhú Ntíaná. ⁶Ko ankjín má kab'ejña xi tíbatéxumoo ta kjijná nku ni xi b'a tjin xi nkúhu ntáchak'un xi 'na xi nkúhu chutsín.

Andaihi má kab'ejña xi tíbatéxumoo tjintu ñju xi tjintu tík'un, xi kitsejnúhu ra tunkun ankjín ko astun. ⁷Xi tjuun b'a tjin xi nkúhu xa. Xi ma johu b'a tjin xi nkúhu turu. Xi ma jahan b'a tjin ankjín xi nkúhu xuta. Ko xi ma ñjuhu b'a tjin xi nkúhu ja xi tífi tjen.

⁸Nga nkúnkú xi ñju tjintu tík'uun jun maha tsjankaha. Kitsejnúhu ra tunkun kintehe ko asunnk'aha. Tu nku nga tíincha sehé nistjin nistjen nga b'a tíincha tsu:

Ntíaná xi tsje, Ntíaná xi tsje, Ntíaná xi tsje.

Ntíaná xi tjinin nga'yún.

Kui xi y'ejña, tijn ko kj'uaí.

⁹Xi ñju tjintu tík'uun tíincha ts'ínkie yjoho nga chánka xi tíbatéxumoo, kui xi tijn tík'un tu nkjéhe ni. Tíincha benkjún ko tíincha tsjáha máb'achjíhi. Ko nk'ie nga b'a tíincha ts'ín xi ñjuu, ¹⁰jáchá xi kan ñjuu tíincha basinkúnch'int'aha nga títs'intsjoho xi tíbatéxumoo, xi tijn tík'un tu nkjéhe ni. Tíincha b'entu coronaha nginkun nga b'i tíincha tsu:

¹¹ Ji Ntiq xi Ntiani, ji xi tjehe ri nga chankjúhin
ko nga s'ehi kjuachánka ko nga'yún.
At'ahq ji kin'endai ngayjee ni xi tjín.
Kama mjehi, kui nga tjíhin ko kamandaha.

**B'i ts'ín tsakuchjíhi Jua nga Chutsanko
tsakj'á xujun xi najmi ch'a maha bakj'á**

5 As'ai kikie nku xujun, kui xi ntsja kixi y'aha xi tibatéxumoo. Kui
xujun xi kin'entú nga jo ngabaha, ko tjíchjanekoho ra yatu sello.
²Kikie nku ntítsje xi 'yún tjíhin nga'yún, kui xi 'yún tínchja nga b'i
títu:

—¿Yá xi tjehe ri nga kjéntiya sello xi tjíchjanekoho xujun ko
kjéxinnka?

³Tunga ndahá nku xi tjín ndjiojmi ján ko ndaha nku xi tjín
asuntee ko ndaha nku xi tjín kintehe t'anankiu najmi kamaha
kikjexinnka xujun, ko ta ndaha najmi kamaha tsa tu tsasehe ni xi
tjít'a. ⁴Tu xí kikjintaná nga najmi ch'a kamaha kikjexinnka xujun ko
ta ndaha tsa tsasehe ni xi tjít'a.

⁵As'ai b'a kitsúna nku ndachá xi kan ñjuu:

—Najmi tu ch'í. Chasei. Xa xi y'ahq ra ntjehe Juda, xi ntjehe
David y'ahq ra, kui xi kits'ín ngana ko kamaha kjéntiya sello yatu xi
tjíchjanekoho xujun ko kjéxinnka.

⁶As'ai ankjín xi tibatéxumoo ko kamasehen xi ñju xi tjintu
tík'uun ko kamasehen jáchá xi kan ñjuu kikie nku Chutsanka xi
s'jña yo, xi b'a tjín xi nkúhu tsa ja kin'ek'ien. Yatu ndjia tjíhin ko
yatu tunkun. Kui xi tsuhu ra espíritu xi yatuhu Ntíaná xi kin'e nibá
ngayjee asuntee. ⁷Ngjikj'á Chutsanko xujun xi kjiya ntsja kixi xi
tibatéxumoo.

⁸Nk'ie nga jakj'á xujun Chutsanko, as'ai xi ñju xi tjintu tík'uun ko
jáchá xi kan ñjuu incha tsasinkúch'int'ahq. Nga nkúnkú incha y'a
najní arpa ko tsa toonsine xi kitsehe ni xi sinje. Kui niu xi bakúchji
ni xi nchja xuta jehe Ntíaná nk'ie nga nchjako Ntíaná.

⁹As'ai incha kise soon tsetse xu'bi:

Ji xi tjehe ri nga chjúbéi xujun ko nga chjúntiyai selloho,
at'ahq ji xi tsayai nga kin'e mahi chje.

Jníhi kich'atsehe ri Ntíaná
ngayjee tíkjá xuta xi tjín,
xi kj'ái kj'ái én nchja,
xi nibá tu má antehé ni,
ko xuta naxinantá xi tjín.

¹⁰ Kui xi kin'e mai nku naxinantá xi tibatexumaihi,
kin'e mai já na'mi xi ts'íintsjoho Ntíaná.
Incha kuatéxumaha asuntee.

¹¹As'ai tsase ko kint'e ntaha nkjin nkjún ntítsje xi t́ínchat'a andaihi xi t́ibatéxumoo ko andaihi xi ñju xi t́jntu t́ík'uun ko jáchá xi kan ñjuu. Tụ ni xí 'yúhún nkjin incha maha. ¹²Yún incha t́inchja nga b'í t́íncha tsu:

Chutsanka xi kin'ek'ien tjehe ra
nga k'uai xáha nga kuatéxuma.
Ts'ínkjáihin kjuanchiná,
kjuankjintak'un ko kjuachánka.
Kui xi kama chankjún ko n'etsjoho.

¹³As'ai kint'e ntaha ngayjee xi kits'ínnda Ntíaná nk'a ján ko asuntee ko kintehe t'anankiu ko ajin ntáchak'uun nga b'í incha kitsú:

Chutsanko ko xi t́ibatéxumoo
n'etsjoho ko chankjún.
Kui xi s'ehe santaha tụ nkjéhé ni
kjuachánka ko nga'yún xi t́ín.

¹⁴As'ai —;B'a katuma! —incha kitsú xi ñju xi t́jntu t́ík'uun. Ko jáchá xi kan ñjuu incha tsasinkúnch'in ko incha kits'ínsjoho Chutsanko ko xi t́ibatéxumoo.

B'í ts'ín tsakuchjhi Jua nga ñju sello kichjux'á

6 Kikie nk'ie nga kikjex'á Chutsanko sello xi tjuun ko kint'e nga kinchja nku xi ñju xi t́jntu t́ík'uun. Ntaha, kui xi nkú joyaha xi nkú ts'ín nu'yá nga faneya ch'on. B'í kitsú:

—;Nibái!

²As'ai tsase ko kikie nku ndje taba. Xi t́jsuhun chu y'a nku ni xi s'eko yá. Kik'aihi nku corona ko tsitju tụ xi ts'ín nganaha.

³Nk'ie nga kikjex'á Chutsanko sello xi ma joho, kint'e nga b'í kitsú xi ma joho xi ñju xi t́jntu t́ík'uun:

—;Nibái!

⁴As'ai tsitju kj'ai ndje, nku ndje ni. Xi t́jsuhun chu kits'ínkjáihin nku kichá chánka ko kik'ai xáha xi má nga kjéxin kjuajyu xi t́ín asuntee, tụ xi ts'ínk'iehen xinkjín xuta.

⁵Nk'ie nga kikjex'á Chutsanko sello xi ma jahan, kint'e nga b'í kitsú xi ma jahan xi ñju xi t́jntu t́ík'uun:

—;Nibái!

As'ai tsase ko kikie nku ndje jma. Xi t́jsuhun chu y'a nku nisuchúba. ⁶Ajihin xi ñju xi t́jntu t́ík'uun kint'e nku nta xi b'a kitsú:

—Nku nistjin xánta nku kilu tuniñu katijnehe, ko nku nistjin xánta jan kilu tu cebada katijnehe. Tụ xí chj'í katuma ni. Tunga najmi tu n'ekoni binu ko ta ndaha setiu.

⁷Nk'ie nga kikjex'á Chutsanko sello xi ma ñjuhu, kint'e ntaha xi ma ñjuhu xi t́jntu t́ík'uun nga b'í kitsú:

—¡Nibái!

⁸As'ai tsase ko kieke nku ndje sine k'ien. Xi tjsuhun chu, kui xi 'mi Ngabaya ko tjennkihí xi 'mi Antehé Xuta K'ien. Nga joo incha kik'aihi kjuá nk'ie nga kjuachán, kjintía, ch'in ko chu kjan xi tjin asuntee incha ts'ínk'ienkoho nku t'íkjá xuta asuntee.

B'i ts'ín tsakuchjíhi Jua nga kichjux'á sello xi ma uhun

⁹Nk'ie nga kikjex'á Chutsanko sello xi ma uhun, kieke kintehe nanchan chje animaha xuta xi kin'ek'ien ngat'aha nga incha y'énijmí éhen Ntjáná ko ngat'aha nga tu nku kits'ínkiehé yjoho nga Jesu yjanki. ¹⁰Yún incha kinchja nga b'i incha kitsú:

—Tsjeni ji, Nda Ntia, ko naxu én xi bixín. ¿Nkjé n'ekokjuai xuta xi t'jintu asuntee? ¿Nkjé n'ek'íechjí xi kits'ínk'ienni?

¹¹As'ai incha kik'aihi najyun taba nga nkúnkú. Tu chubaha nistjin incha kúya kik'ihin, santaha nkúhu nga kama ndjuú xkihí xuta xi ta t'jihin nga n'ek'ien xi nkúhu nga kui, xi nts'e maha xinkjín xi ta t'íncha yjankihí Jesu.

B'i ts'ín tsakuchjíhi Jua nga kichjux'á sello xi ma juhun

¹²Nk'ie nga kikjex'á Chutsanko sello xi ma juhun, tsase ko kama nku chón xi tu xí 'yúhún. Kama jma ts'íu xi nkú joyaha najyun xi jma sénsén. Ni kama sóo xi nkú joyaha jní. ¹³Niñu xi tjin nk'a ján tsixuntu t'anankiu xi nkú ma nga bixuntu tu chjintéhe yá higuera nk'ie nga b'étsujnehe nku ntjo xi 'yún. ¹⁴Xi nkú ma nga s'ekjoya xujun, b'a ts'ín kindyjajin sén nk'a ján. Ko ngayjee naxiu ko xjo xi tjin ajin ntáchak'uun incha ngji t'axín.

¹⁵Incha ngjik'ientu'má aya tixa ngijoo ko ajin naxiu já rei, já títjuun, já jun k'aku, já nchinóo, já i ko ngayjee xuta, xi ndáhi yjoho ko xi musuhu xi kich'atsehe. ¹⁶B'a incha kitsúhu jñáchóo ko ndjio naxiu:

—Tixuntunéni ko t'entu'máni, tu xi najmi skueheni xi tibatéxumoo ko tu xi najmi chahani kjuakjan chánkaha Chutsanko. ¹⁷At'aha ja kuichu nistjin nga ja kuakúchji kjuakjan chánkaha. ¿Yá xi kuichúkjuaha ni xi kama?

B'i ts'ín tsakuchjíhi Jua nga xuta xi ntje Israel tjeheh ra kis'et'aha chubaha Ntjáná

7 Nk'ie nga ja kama ni xu'bi, as'ai kieke ñju ntítsje xi t'íncha ndju nga ñju t'íkjáha asuntee. Kui xi t'ib'échjaha ntjo xi nibáha nga ñju t'íkjáha asuntee tu xi najmi tsjéhen ntjo asun t'anankiu, ta ndaha asun ntáchak'uun, ta ndaha ajihin yá xi tjin asuntee. ²Ta kieke k'iaí

ntítsje xi t́inibáha má tju ts'íy. Kui xi j'ai tū xi k'uét'aha ra chubaha Ntíaná xuta xi ts'e. Kui ntítsje xu'bi 'yún kikjintáyaha ntítsje xi ñjuu xi kik'qihí xáha xi má nga ts'ínkatsún t'anankiu ko ntáchak'uun.

³B'i kitsúhu:

—Najmi tū chumi nihi xi n'ohoo t'anankiu ko ta ndaha ntáchak'uun ko yá xi t́ín. Nk'iehé nga ja s'et'aha stjen chubaha Ntíaná xuta xi ts'e, nk'iehé nga kama k'úét'a ntsoo.

⁴Kint'e xkihí xuta xi kis'et'aha chuba. Unchan ko yachán ñju mii kama ngayjee ntjehe Israel. ⁵B'i t́ín kamaha nga nkúnkú ntje te joo: te jo mii xi ts'e Juda, te jo mii xi ts'e Ruben, te jo mii xi ts'e Gad, ⁶te jo mii xi ts'e Aser, te jo mii xi ts'e Neftali, te jo mii xi ts'e Manase, ⁷te jo mii xi ts'e Simeon, te jo mii xi ts'e Levi, te jo mii xi ts'e Isacar, ⁸te jo mii xi ts'e Zabulon, te jo mii xi ts'e Kuse, ko te jo mii xi ts'e Benjamin.

B'i ts'ín tsakuchíhi Jua nga tū xí nkjihín xuta incha tsitjujin kjuanimq chánkoo

⁹Nk'ie nga ja kama ni xu'bi, as'ai tsase ko kkie nkjin nkjún xuta. Ndaha najmi ch'a ma b'éxkihí. Ngayje t́kjá xuta xi t́ín asuntee niu, ngayje t́kjá ntje, ngayje t́kjá nanki ko ngayje t́kjá én. T́incha ndju ankjín xi t́batéxumoo ko nginkun Chutsanko. Najyun taba incha yja ko xkajén incha y'a.

¹⁰'Yún t́incha kjintáya nga b'i t́incha tsu:

¡Nkuhú Chutsanko ko Ntíaná xi t́batéxumoo,
kui xi ts'ínk'ankiná!

¹¹Ngayjee ntítsjee xi t́incha ndju andaihi má kab'ejña xi t́batéxumoo, andaihi jáchá xi kan ñjuu ko xi ñju xi t́intu t́k'uun, incha kingjénsten ankjín nga incha kits'intsjoho Ntíaná. ¹²B'i incha kitsú:

¡B'a t́ín!

N'etsjoho ko t́ihin kjuachánka Ntíaná,
be nkú ts'ín ts'ínk'ankin'kun ko 'b'qihí máb'achj́hi,
yankjún ko bakúchji nga'yúhun santaha tū nkjéhi ní.
¡B'a katuma!

¹³As'ai nku ndachá xi kan ñjuu kingásjaiyana:

—¿Yá xutaha xi yja najyun taboo? ¿Má incha kanibáha?

¹⁴—Ji xi yai, Ndá Ntía —kixihín.

As'ai b'i kitsúna:

—Kui xi incha kkie kjuanimq chánkoo. Jníhi Chutsanko incha kits'ín tabakoho nga tsané najyuhun. ¹⁵Kui kjuaha nga t́inchaha ankjín Ntíaná xi batéxuma ko nistjin nistjen t́incha ts'intsjoho aya ninkuhú. Xi t́batéxumoo kuhun xuta xu'bi aya ante nkjúhun. ¹⁶Najmi ta skuehe kjintá ko ta ndaha najmi ta xintá kamaha ra.

Najmi ta ts'ínchjahan ra ts'íu ko najmi ta ts'ínstihj ra nubóo.
 17 At'aha Chutsanka xi ta tibatéxumoo, kui xi nda bastu xi kúnntaha ko ngjuaikohó má tjín ntánijua xi ts'ínk'íéntu tík'uhun xuta. Ntíaná ts'ínxijnu ntánkun nga nkúnkú.

B'í ts'ín tsakuchjhi Jua nk'ie nga kichjux'á sello xi ma yatuhu

8 Nk'ie nga kíkjex'á Chutsanko sello xi ma yatuhu, as'ai kis'e jyu jyu ndjiojmi ján nkú ra ma masen ora. ²Kikie ntítsje xi yatuu xi tíncha ndju nginkun Ntíaná. Kui xi kik'aihi yatu tjio.

³As'ai j'ai kj'ai ntítsje. Ankjín nahan chje j'ai sinjña. Nku ni toonsine xi má nga tisún ni xi sinjne y'a. Kik'ai nkjúhun ni xi sinjne tu xi tsjáha ra chje Ntíaná asun nahan chje toonsine xi kjjña ankjín xi tibatéxumoo. Kui niu kits'íntjijinkohó ni xi nchja ngayjee xutaha Ntíaná nk'ie nga incha nchjako. ⁴Y'ahá ts'íhin ntítsjee ni xi títyá ni xi sinjne nk'ie nga ngjisehe Ntíaná ntaha ni xi sinjne ko ni xi incha nchja xutaha Ntíaná nk'ie nga nchjako. ⁵As'ai jakj'á ntítsjee tabaha ni xi sinjne ko kits'íntsehe x'í xi tjíntusún nahan chje. Asuntee kíkjaník'asún niu. As'ai janeya ch'on, xághan kama, tsat'ai nd'ích'on ko kama chón.

B'í ts'ín tsakuchjhi Jua nk'ie nga jane ñju tjio

⁶Incha y'énda yjohó ntítsje xi yatuu xi má nga incha ts'ínkjane tjioho. ⁷Kits'ínkjane tjioho ntítsje xi tjuun. As'ai kichjanikj'a asun t'anankiu ts'í ndjio ko nd'í xi kin'etjijinkohó jní. Kití nku tíkjá t'anankiu ko nku tíkjá yá xi tjín ko ngayjee jña xi tjín.

⁸Kits'ínkjane tjioho ntítsje xi ma joo. As'ai kichjanikj'ajin ntáchak'uun nku ni xi b'a tjín xi nkú joyaha nku naxi chánka xi títi. Jní kama nku tíkjá ntáchak'uun. ⁹K'ien nku tíkjá xi tjíntu tík'un ajin ntáchak'uun ko kin'ekje nku tíkjá yábarku xi tjín.

¹⁰Kits'ínkjane tjioho ntítsje xi ma jaan. As'ai j'aikijne nku niñu chánka xi títi xjo xjo. Kits'ínkatsún nku tíkjá ntáje ko ntá tixa xi tjín. ¹¹Sja 'mi niñuu. As'ai nku tíkjá ntá xi tjín kama sja. Tu ngat'aha nk'ie nga kama sja ntóo tu xi nkj'hín xuta k'ien.

¹²Kits'ínkjane tjioho ntítsje xi ma ñjuu. As'ai nku tíkjá ts'íu, sóo ko niñuu kin'ekatsún. B'a tjín niu xi kis'ejuryún. Nk'ie nga incha kits'ín ndzjen niu nku tíkjá nistjiun najmi ta kama ndzjehen ra ko ta nku tíkjá nistjen najmi ta kama ndzjehen ra.

¹³As'ai tsase ko kint'e ntaha nku ja xi tífi tjen. 'Yún tíintáya nga b'í títu:

—¡Kjuanimá nibá! ¡Nimá rú ts'íhin xuta xi tjíntu asuntee nk'ie nga kjuane tjio xingisoo xi ja ma ma incha ts'ínkjanehé ntítsje xi jan xi ndyjat'óo!

**B'i ts'ín tsakuchjíhi Jua nk'ie
nga jane tjio xi ma uun**

9 Kits'ínkjane tjioho ntítsje xi ma uun. As'ai kieke nku niñu xi nibaha nk'a ján nga j'aikijne asuntee. Kik'aihi yubihí tixa nanka xi tjen t'anankiu. ²Kikjex'á tixa nanko ko yo tsitjunji ninti xi nkú joyaha ninti xi bitjuhu nku orno chánka. Kits'ín jyun ts'iu ko nk'oo.

³Ajin nintiu incha tsitjuhu chjuba xi incha j'aitsesúhun asuntee. Incha kik'aihi nga'yún xi nkúhu nga'yún xi tjihin chándayá ch'onk'un xi tjin asuntee. ⁴B'a kik'ihin nga najmi incha ts'ínkatsún jñá xi tjin t'anankiu ko ta ndaha nku ni xkfén xi tjin ko ta ndaha nku yá. Nku tutuhú xuta xi najmi kis'et'ahq stjen chubaha Ntíaná xi kama incha ts'ín'uhun.

⁵Najmi kik'aihi kjuq tsa ts'ínk'ien xuta. Tu b'ahá kik'ihin nk'ie nga tu uhún sá tsjáha kjuanima xuta xi kjinehe. Kjuanima xi tsjá chu b'a joyaha xi nkú ts'ín kjineya má kjenená chándayá ch'onk'un xi tjin. ⁶Kui nistjiun kuangisjai ngabayoo xuta tunga najmi sakúhú ra. Kama mjehe nga kuayá tunga ngjuai t'axíhín ngabayoo.

⁷B'a k'un chjubo xi nkú joyaha ndje xi kis'enda nga ngjuai kjuachán. B'a k'un corona toonsine k'un ni xi incha tjintu'áha. B'a k'un ankjin xuta k'un ankjin. ⁸B'a k'un ntsjaha xi nkúhu ntsjaha jminchjin. B'a k'un ni'yun xa k'un ni'yun. ⁹B'a k'un kicha k'un ni xi kjijnuhu 'mehe. B'a ts'ín faneya tsjankaha xi nkú ts'ín faneya nkjin nkjún yá xi fiko já juun nk'ie nga incha fi kjuachán. ¹⁰B'a k'un nits'in chándayá ch'onk'un k'un nits'in chu. Ta tjihin na'yá ch'onk'un. Ni ch'onk'un xi tjihin nits'in nga ts'ín'uhun xuta un sá chúkjuaha niu. ¹¹Ntítsje xi tjña ayaha tixa nanko, kui xi batéxumaha chjubo. Abadon 'mi ntítsjee nga én hebreo, ko nga én griego Apolion 'mi. “Xi ts'ínkatsún ni” tsuhu ra j'áihin.

¹²J'a kjuq'un xi tjuun, tunga ndyjahá sa jo.

**B'i ts'ín tsakuchjíhi Jua nk'ie
nga jane tjio xi ma juun**

¹³Kits'ínkjane tjioho ntítsje xi ma juhun. As'ai kint'e nku nta xi nibaha kamasehen ndjia xi ñju xi tjintut'á nqchan chje toonsine xi kjijña nginkun Ntíaná. ¹⁴B'i kitsúhu ntítsje xi ma juhun xi y'a tjio: —N'e ndáihí nga ñjuu ntítsje xi tjintut'á 'yún andai ntáje chánka Eufrate.

¹⁵As'ai kin'e ndáihí ntítsje xi ñjuu, tu xi nku t'íkjá xuta xi tjin asuntee incha ts'ínk'iehen. At'ahq ja b'a ts'ín tjinda nga kui xi b'a incha ts'ín kui chubo, kui nistjiun, kui sóo ko kui núu. ¹⁶Kint'e xkihí já jun xi tjintusúhun ndje. Jo unchan miyoon maha.

¹⁷Kikie ndje ko xi tjintusuhun, xi nkúhu tsa nchini kik'aina nga kama chjina niu. Kicha xi kijnu 'mjehe, ni xi nkúhu nd'í, su xi nkúhu ndjio tsjo k'un safiro ko sine xi nkúhu sufri. B'a k'un nintaku xa k'un nintaku ndje. Nd'í, ninti ko sufri bitju ts'a. ¹⁸Tu ngat'aha nga jaan kju'a'un xi kitsjá chu nku t'kja xuta xi tjin asuntee k'ien. Nd'í, ninti ko sufri xi bitju ts'a chu b'a kits'íun. ¹⁹Ts'a ko nits'in chu xi ch'onk'un. Nits'in chu b'a k'un y'e k'un, xi yjahá nintaku. Kui niu xi ts'in'unkehoro ra xuta.

²⁰Tunga xuta xi ts'ankiu, xi najmi kits'ínk'iehen kju'a'un xu'bi, najmi incha ngjik'áha ra animaha ko ta ndaha najmi y'entu ni xi incha kits'ín. Tu nku kits'intsjohó ra janindoo ko ntia xi kits'ínndakoho toonsine, toontaba, kicha, ndjio ko ya. Najmi ma chjiji niu, ta ndaha najmi nt'é ko ta ndaha najmi ma fi. ²¹Ta ndaha najmi incha ngjik'áha ra animaha xuta xu'bo ngat'aha nga animá incha ts'ínk'ien, tje incha ts'ín, chuba fantukohó xinkjin ko ndyje incha ts'ín.

B'i ts'ín tsakuchjhi Jua ntítsje xi y'a xujun

10 As'ai kieke kja'í ntítsje xi tjenjin ninti. 'Yún nk'a tjen. Ndjiojmi jan nibajehen ko nku yejna sintjaihi. Xi nkúhu ts'íu b'a ts'ín tibat'ai ankjin, ko sjai xi nkúhu yásjai xi títi. ²Kjiya ntsja nku xujun ichi xi kabix'á. Tsasijnasun sjai kixi ntáchak'uun ko sjai skjún tsasijnasun t'anankiu. ³As'ai 'yún kikjintáya ko kinu'yá ntaha xi nkú ts'ín nu'yá ntaha xoo nga kjintá. Nk'ie nga kikjintáya, yatu niyá janeya.

⁴Nk'ie nga janeya yatu niyóo, ja tít'sinntá kai, tunga kint'ená nku nta xi nibaha ndjiojmi jan xi b'a kitsúna:

—Najmi tu kayaha ni xi kuatsú ch'on xi yatuu. Najmi tu b'et'ai.

⁵As'ai kingjénnk'a ntsja kixi ntítsje xi nku sjai sijnasun ntáchak'uun ko xi nku sjai sijnasun t'anankiu. ⁶Kits'ínkie xi tijná t'k'un tu nkjéhé ni, kui xi kits'ínnda nk'a jan ko ni xi tjin nk'a jan, xi kits'ínnda t'anankiu ko ni xi tjin t'anankiu, xi kits'ínnda ntáchak'uun ko ni xi tjin ntáchak'uun. B'i kitsú ntítsjee:

—Ja najmi ta k'uandayaha ra. ⁷Nistjin nk'ie nga ts'ínkjane tjioho ntítsje xi ma yatuhu kuitjusun ni xi y'ejña 'ma Ntiana. B'a kama xi nkú nga ts'ín kitsúya títjuhun já profeta xi ts'e.

⁸As'ai ta kinchjakohó ngáhana nta xi kint'e, xi nibaha ndjiojmi jan. B'i kitsúna:

—T'in ko chjúbéi xujun xi kabix'óo, xi kjiya ntsja ntítsje xi sijnasun ntáchak'uun ko xi sijnasun t'anankiu.

⁹Kui nga b'a ngji xihin ra ntítsjee nga tsjáhana xujun ichíu. As'ai b'i kitsúna:

—Chjúbéi ko chinej. Xi nkúhu ntsjén kama aya tsu'bai niu, tunga aya kants'ai sja kama.

¹⁰As'ai jakj'a xujun ichí xi kjiya ntsja ntítsjee ko kikjíne. Xi kama aya tsu'ba xi nkúhu ntsjén. Tunga nk'ie nga ja kitujen, sja kama aya kants'á. ¹¹As'ai b'a kik'inna:

—Tjihin nga ta kuixinya ngáha ri xuta ni xi Ntíaná ja kits'ínkinchja já profeta. Kuixinyai ni xi Ntíaná ts'ínko xuta xi tjín tu má nankihí ni, tu má antjehé ni, xi nchja tu má éhén ni ko já rej.

**B'i ts'ín tsakuchíhi Jua jo já xi
kits'ínkie yjohó nga Jesu yjanki**

11 As'ai kik'aina nku yá xá xi ch'achubako ko b'i kik'inna: —Tisintjein. Ch'achubai ninkuhu Ntíaná ko nathan chje. T'exki nkú tjín maha xi incha ts'intsjohó Ntíaná yo. ²Tunga najmi tu ch'achubaní ante xi tjíña natsihin ninku, at'aha xuta xi najmi be Ntíaná ja kik'áihí kui antee. Kui xi incha kuasinne nga ts'ínkatsún nanki jee yachán jo sá tjihin. ³Ts'inkjía jo já xi k'uéjña chji nga yjankina. Incha ngjuá najyun kfe ko kuinchja ngajona nku mií ko jo unchan ko cháte ko te nistjin.

⁴Kui já xi joo, kui xi nga joo yá olibo ko nga joo ni xi s'etísun nd'í xi t'íncha nginkun Ndá Ntíaha asuntee. ⁵Tsa tjín xi mjehe ts'ín'uhun xi joo, ts'a kuitjuhu nd'í xi k'uéti ngayjee já kontraha. B'a ts'ín kuayá tu yáhá ni xi mjehe incha ts'ín'uhun. ⁶Kamaha k'uéchja nk'a ján tu xi najmi ta k'uaha ts'í xi nkú tjín nistjin kamaha nga incha kuinchja éhen Ntíaná. Ko ta kamaha jní ts'ín ma ntánijuó ko kamaha tsjáha kj'ái kj'ái kjuá'un asuntee tu xi nkú tjín niyá mjehé ra nga b'a incha ts'ín.

⁷Nk'ie nga ja kama ndjuúhu já xi joo nga k'uénjímí, as'ai chu xi kuitjunji tixa nanko kjaánko jóo. Ts'ín nganaha ko ts'ínk'ien. ⁸S'entu yjoninte k'iehen aya niyátéhe nanki chánko má ta kis'et'a kruu Ndá Ntíaha. Kui nankiu xi nanki Sodoma ko ante Egipto chubaha nga nkuhú n'e mako chubaya. ⁹Jan nistjin masen kamaha nga incha kuasehe yjoninte k'ien xuta xi tjín nkú tjín nanki xi tjín, nkú tjín maha ntjehe xuta xi tjín, nkú tjín maha xuta xi nchja tu má éhén ni, ko nkú tjín ante má nga tjintu. Najmi tsjánte nga incha s'eyanji yjoninte k'ien. ¹⁰Tsjo kamaha xuta xi tjintu asuntee ngat'aha ngabayaha. S'ehe kjuatsjo ko b'i ngján tsjáha xinkjín ni, at'aha kjuasti kitsjáha xuta xi tjintu asuntee já profeta xi joo.

¹¹Tunga nk'ie nga j'a jan nistjin masen, Ntíaná kits'ínk'íentu t'ík'un ngáha ra. Incha tsisintjen ngáha, ko tu ni xí incha kitsankjúhún ngayjee xi kiekehe. ¹²As'ai incha kint'é nku nta xi 'yún kinchja, xi nibaha ndjiojmi ján nga b'i kitsúhu:

—jNibánjiu eí!

As'ai nku ninti ngjinjikohó ndjiojmi ján ko kiekehe xuta kontraha. ¹³Ta kuihi chubo kama nku chón xi tu xí 'yúhún. Nku t'íkjá nankiu

je. Yatu mij xuta kits'ínk'iehen chón. Xuta xi ts'ankihí yjohó tū ni xí incha kitsankjúhún. Incha kits'ínkie yjohó nga chánka Ntíaná xi tǐjña ndjiojmi ján.

¹⁴J'a kjuanima xi ma johó, tunga jahá nibá tiña xi ma jooñ.

**B'í ts'ín tsakuchjǐhí Jua ni xi kama
nk'ie nga jane tjio xi ma yatuhu**

¹⁵Kits'ínkjane tjioho ntítsje xi ma yatuhu kó kinu'yá ndjiojmi ján nkjin nta xi 'yún kinu'yá nga b'í incha kitsú:

Má tsatéxuma xuta,

Ntíaná kó xi kits'ín nibá ngajohó
ja tǐncha batéxuma yó nd'ai.

Kui xi kuatéxuma santaha tū nkjéhé ni.

¹⁶Jáchá xi kan ñjuu xi tǐntu nginkun Ntíaná incha kingjénsten kó kits'íntsjohó Ntíaná. ¹⁷B'í incha kitsú:

Tí'baihí máb'achjǐhí jǐ, Ntíaní xi tǐhín nga'yún,
Ntía xi tǐjña kó y'ejña.

At'aha ja tǐn'echjéin nga'yún chánka xi ts'í,
kó ja kuach'atuts'ihín nga tǐbatexumai.

¹⁸Kama kjahan naxinantá xi tǐjn asuntee,
tunga jahá kuichu nǐstjihín kjuakjan chánkahi,

chuba nga kamaha kjuá xuta xi k'ien.

Kó k'uaihí chjǐ xi sakúhu xuta xi ts'í,
já profeta kó xuta xi naxu kits'ín,

ngayjee xi bekjúhin,

xi ihí kó xi xixihí.

N'ekje xi ts'ínkatsún asuntee.

¹⁹As'ai tsix'á ninkuhu Ntíaná xi sǐjña ndjiojmi ján kó kiya aya nínku kaxa tsje xi bakúchji ni xi y'éndakó Ntíaná xuta xi ts'e. Tsat'ai nd'ích'on kó xághan kama. Janeya ch'on, kama nku chón, kó 'yún kik'a ts'í ndjio.

**B'í ts'ín tsakuchjǐhí Jua nku
tachjuún kó nku chuyatuku**

12 As'ai kama chji ndjiojmi ján nku ni chánka xi tsakúchji ni xi kama. Kiya nku tachjuún xi kingja ts'íu xi nkúhu x'ótji. Sóo kis'ejña kinte tsuku kó tǐjn'aha nku coroná xi te jo niñu tǐhín. ²Ntí y'a kó chjintihí ntíu tǐkjintáyako nga un tǐbehe.

³Tá kama chji ndjiojmi ján kj'ai ni xi tsakúchji ni xi kama. Kiya nku ye chánka xi ni. Yatu maha nintaku kó te ndjiaha. Nga nkúnkú nintaku nkúnkú coroná tǐ'aha. ⁴Nits'in kikje'yúnkoho nku tǐkjǐa niñu xi tǐjn nk'a ján kó kikjaníkj'ajen asuhun t'anankiu. Tsasin'yún chuyatuku nginkun tachjuún xi ja ma tsíhín ntíhí tū xi kjinehe ntíu nk'ie nga tsín.

⁵As'ai nku ntíx'in kitsihin tachjúun. Kui xi tjíhin nga ndjá kuatéxumaha ngayjee naxinantá xi tjín asuntee. Tunga kichju'áhá ra ntíhi tachjúun. Má b'ejña Ntíaná nga batéxuma ngji s'ejña ntíu.
⁶As'ai ante kixiu ngji tachjúun nga tsanka. Má y'éndaha Ntíaná nku ante ngji, tu xi yo n'ekjéhen nku mii ko jo unchan ko cháte ko te nistjin.

⁷As'ai kama nku kjuachán ndjiojmi ján. Ntítsje Miguel ko ntítsje xi tjenkoho incha kikjánko chuyatuku. Kikján chuyatuku ko ntítsje xi tjenkoho. ⁸Tunga kits'inndyjahá ko najmi ta kis'ehe ra ante ndjiojmi ján. ⁹Tsich'onsje chuyatuku chánkoo, kui xi ye chóo xi 'mi ndaninda ko xi ta 'mi ya Satana, xi b'anachaha ngayjee xuta xi tjín asuntee. Kui ko ntítsjehe kichjaníkj'ajen asuntee.

¹⁰As'ai tu xí 'yúhún kinu'yáha nku nta xi kint'e ndjiojmi ján. B'i kitsú:

—Nd'ai kuats'ínk'anki Ntíaná xuta xi ts'e, kuakakúchji nga'yúhun ko nk'ie nga kui batéxuma. Xi kits'ín nibá Ntíaná^b tibatéxuma. At'aha ja kuich'onsje xi batéjéne já nts'eé. Kui xi nistjin nistjen batéjénehe nginkun Ntíaná. ¹¹Ngat'aha jníhi Chutsanko kuats'ín nganaha já nts'eé, at'aha kuats'ínkie yjoho nga yjanki Jesu. At'aha najmi incha kitsankjún nga kuayá. ¹²Kui nga n'etsjohonu xi tintsuboo ndjiojmi ján, tunga nima rú n'ehenu jun xi tintsuboo asuntee ko ajin ntáchak'uun. At'aha kaf'ajjénk'unnuu ndanindoo. 'Yún kjan tímaha at'aha be nga chuba nistjin tijnaha.

¹³Nk'ie nga ja kieke chuyatuku nga ja kichjaníkj'ajen asuntee, as'ai tsanka tjennki tachjuún xi kitsihin ntíx'iun. ¹⁴Tunga johó tsjanka ihí ja kik'aihi tachjúun tu xi kama ngjuai tjehen ante xi tijnaha ante kixiu. Ngji t'axín kjihin ye ante má nga kin'ekjén jan nú masen tjíhin. ¹⁵As'ai ts'a chuyatuku tsasje xi nkúhu nku ntáje, tu xi kui ntóo kjébéfehe ra tachjúun. ¹⁶Tunga t'anankiuhú tsasinkoho tachjúun. Kitsjen nku tixa má nga jas'en ntáje xi ts'asje ts'a chuyatuku.

¹⁷As'ai tu xí kama kjahán ra chuyatuku ngat'aha ni xi kamo ko ngji kjánko ntje xi tjíhin tachjúun, kui xutaha xi f'átjo kjuatéxumaha Ntíaná ko tu nku kits'ínkiehé yjoho nga Jesu yjanki. ¹⁸As'ai ngji sinjña chuyatuku andai ntáchak'uun.

B'i ts'ín tsakuchjíhi Jua chu xi tsitjújín ntáchak'uun

13 As'ai kieke nku chu xi tsitjújín ntáchak'uun. Yatu maha nintaku ko te maha ndjiaha. Nga nkúnkú ndjiaha nkúnkú coroná tjintu'áha, ko nga nkúnkú nintaku nku j'áin xi najmi sasíhin Ntíaná jtít'aha. ²Chu xi kieke b'a tjín xa sine tjín, ko b'a k'un sjai xi nkúhu sjai chu oso, ko ts'a b'a tjín ts'a leon tjín. Chuyatuku

^b 12:10 “Xi kits'ín nibá Ntíaná” tsuhu ra “Cristo”.

kikjanínk'a chü xu'bo nga kitsjá xáha. Y'éjña tíjün ko chánka kits'ín ma. ³B'a tjin xi tu xí kin'e'uhún ra nku nintaku tjin, tunga kin'enkihí ra má nga kin'e'uhún. Ngayjee xuta asuntee incha kama nkjúhün ko kitsjennkihí chü. ⁴Incha kits'íntsjohe xuta chuyatuku, at'aha kitsjá xáha chü xinkuu nga kui xi kuatéxuma. Ko ta incha kits'íntsjohe chü xinkuu. B'i incha kitsú:

—Najmi tjin sa kj'ai xi nkúhu chü. ¿Yá xi kama kjaánkoho?

⁵Kik'aiñtehe chü nga nk'a k'uasje yjoho ko nga najmi skuenkjún Ntíaná nga kuinchja, ko kik'aiñi nga yachán jo sá kuatéxuma. ⁶As'ai chü najmi kikienkjún Ntíaná nga kinchja. Ch'on kitsúhu Ntíaná ko ante xi má nga tjin Ntíaná ko ngayjee xi tíntu ndjiojmi ján. ⁷Ta kik'aiñtehe nga kjaánko xuta jehe Ntíaná ko nga ts'ín nganaha. Ta kik'aiñi nga kuatéxumaha nkú tjin maha ntjehe xuta xi tjin, nkú tjin nanki xi tjin, nkú tjin maha xuta xi nchja tu má éhén ni ko nkú tjin ante má nga tíntu. ⁸As'ai incha kits'íntsjohe chü ngayjee xuta xi tjin asuntee xi najmi tíntunt'á j'áñin xujun xi ts'e Chutsanka xi kin'ek'ien. At'aha kintehe ni nga kamanda asuntee xujuhün Chutsanko tíntut'á j'áñin ngayjee xi k'úentu tikuun. Kui xi najmi incha kits'íntsjohe chü.

⁹Xi tjen tjabaxínñju katasínñju. ¹⁰Xi tjin nga ngjuainijé, kui xi ngjuainijé. Xi tjin nga n'ek'ienkoho kicha, kui xi kicha kuayáha. Kui nga tjin nga ts'ín chükjuaha xuta jehe Ntíaná ko ndjá kuinchajin ni xi s'eñin.

B'i ts'ín tsakuchijhi Jua chü xi tsitju t'anankiu

¹¹As'ai kikié kj'ai chü xi tsitju t'anankiu. Jo maha ndjiaha. B'a k'un ndjio xi nkúhu ts'e chutsanka, tunga b'ahá ts'ín nchja xi nkúhu chuyatuku. ¹²Ngajoho chü xi tjuun batéxuma. Kits'ín chi nga xuta xi tíntu asuntee incha ts'íntsjohe chü xi tjuun, chü xi kin'enkihí má tu xí uhún ra. ¹³Kits'ín kjuankjún chánka chi, santaha kits'ín nibájen nd'í asun t'anankiu nginkun xuta. ¹⁴Nga'yún xi kitsjáha chü xi tjuun ts'anachakoho ra xuta nginkun chü xi tjuun. Kits'ín kjuayúhün ra xuta nga ts'ínnda nku sénnistjihin chü xi tjuun, tu xi chankjúhun xi najmi k'ien nk'ie nga tsichaya.

¹⁵Kik'aiñtehe chü xi ma joho nga ts'ínk'íéjña tikuun sénnistjihin chü xi tjuun, tu xi kuinchjaha sénnistjün ko ts'ín nga n'ek'ien ngayjee xi najmi ts'íntsjohe. ¹⁶Ko kits'ín chü xi ma joho nga s'et'aha chuba ntsja kixi ko a ra stjen ngayjee xuta, xi ihí ko xi xixihí, xi nchináha ko xi x'ahan, xi ndaíhi yjoho ko xi najmi ndaíhi yjoho. ¹⁷Kits'ín nga najmi ch'a kama k'uatse ko a ra kama kuatéña tsa mí nihi, tsa najmi tjin chubaha chü ko tsa j'áñin chü ko a ra xkihí j'áñin chü.

¹⁸Kui ni xu'bi xi machjéhen kjuankjintak'un. Xi mankjihin kat'asje xkihí chü, at'aha xkihí j'áñin ndahá niu. Jun unchan ko cháte ko tj'ion nku niu.

**B'i ts'ín tsakuchjíhi Jua já xi Ntíaná
kits'ínkjas'eheh yjoho**

14 As'ai tsase kō kíkíe nga Chutsankō sijn̄asun asunntu tjenki Sion. Tíinchat'ahā unchan kō yachán ñju mī xuta xi tjíntut'áha stjen j'áih̄in Chutsankō kō j'áih̄in Na'mih̄i Chutsankō. ²Kint'e nku ntā xi nibaha ndjiojmi ján. Janeya ntō xi nkú ts'ín faneya ntáje nga ma 'yún kō xi nkú ts'ín faneya ch'on. B'a tā ts'ín jane ntā xi kint'e xi nkúhu nkjin nkjún arpa xi t'n'ekjane.

³Nginkun xi tibatéxumoo kō nginkun xi ñju xi tjíntu t'ík'uun kō nginkun jáchá xi kan ñjuu, tjin xi t'íncha se nku soon tsetse. Najmi ch'a tímaha soon xu'bo, nku tutuhú xi unchan kō yachán ñju mī xi tsitjujin ajih̄in xuta asunntee. ⁴Kui xi najmi incha kits'ínsi yjoho tsa jminchjín kikjantuko, at'ahā najmi y'entuko chjuún. Tshu rā nī nk'ie nga najmi incha kits'íntsjohe kj'ái ntia. Incha yjankih̄i Chutsankō tū má nga tífih̄i. Kui xi kis'echjintjai ajih̄in xuta xi tjin. Kui xi tí'baih̄i Ntíaná kō Chutsankō nga chje xi tjun t'íncha n'e ma. ⁵Ndaha nku én tsank'á najmi incha kinchja, at'ahā kui xi je nginkun Ntíaná.

**B'i ts'ín tsakuchjíhi Jua nga
incha kinchja jan ntítsje**

⁶As'ai kíkíe kj'ái ntítsje xi tsú'ba tjen nk'a ján nga nibáko én nda tsuhu Ntíaná, kui xi tū nkjéhé ni chjíhi rā. Kui xi s'enijmíhi xuta xi tjíntu asunntee, nkú tjin nanki xi tjin, nkú tjin maha ntjehe xuta xi tjin, nkú tjin maha xuta xi nchja tū má éhén ni kō nkú tjin ante má nga tjíntu. ⁷'Yún kinchja ntítsjee nga b'i kitsú:

—Chankjún Ntíaná kō n'ekio yjonuu nga kui xi chánka, at'ahā ja kuichu chubā nga ts'íínkōkjua xuta. N'etsjohoo xi kits'ínnda nk'a ján kō t'anankiu, ntáchak'uun kō ntá tixa xi tjin.

⁸As'ai nku ntítsje xi ma joho b'i kitsú:

—Ja kuan'ekje, ja kuan'ekje nanki chánka Babilonia. Kits'ín ch'i ngayjee xuta, tū xi tū mí ni ch'onk'uhún ni incha ts'ín xi nkú tā ts'ín kui.

⁹As'ai nku ntítsje xi ma jahan b'i kitsú:

—Tsa tjin xi ts'íintsjohō chu kō sénnistjih̄in kō tsjante nga s'et'ahā chubāhā stjen kō tsa ntsja, ¹⁰kui xi t'íh̄in nga ts'íínkjáinyjehe kjuakjan chánkahā Ntíaná. B'a kamahā xi nkú mahā xi 'yún 'bi xán xi najmi kichjujehen nga'yúhun. Nd'í kō sufr̄i k'uajikohō rā kjuan̄ima nginkun ntítsje jehe Ntíaná kō nginkun Chutsankō. ¹¹Ndaha tsa mí yjehe najmi kamandyjaya nintih̄i nd'í xi tsjā kjuā'un. Ndaha nku nistjin kō ndaha nku nistjen najmi ts'íínkj'áíya xi ts'íintsjohō chu kō sénnistjih̄in kō xi ts'íínkjáih̄in chubāhā j'áih̄in. ¹²Kui nga t'íh̄in nga ts'ín chúkjuāha xuta jehe Ntíaná, xi f'átjo kjuatéxumaha kō s'ejih̄in Jesu.

¹³As'ai kint'e nku ntá xi nibaha ndjiojmi ján nga b'i kitsúna:

—T'et'ai ni xu'bi: “;Nd'ai t'ib'atuts'inhin ra nk'ie nga nda t'ín ts'e xuta xi kuayá nga s'ejihin Ntíaná!”

Ko b'i títu Espiritu:

—Johon, b'a t'ín. Kui xutaha xi incha ts'ínkj'áiya at'aha ndjá xá xi incha kits'ín. Ntíaná tsjáha chj'íhi xuta xu'bo ngat'aha ngayjee ni nda xi incha kits'ín.

B'i ts'ín tsakuchj'íhi Jua nkú ts'ín kichjusítjen chahan asuntee

¹⁴As'ai tsase ko kieke nku nintí taba. Asun nintiu t'ijnasun nku xi b'a t'ín xi nkúhu Nt'íhi Ndax'iun t'ín. Tj'íaha nku coroná toonsine. Kjiya ntsja ya nku kichá yjo xi n'echjén nga ti tuniñu. ¹⁵As'ai ninku tsitjuhu kj'ai ntítsje ko 'yún kinchja nga b'i kitsúhu xi t'ijnasun nintiu:

—Ja kama chá ni xi t'íntje asuntee. Kichahi t'ichákohoni niu ko ch'atjói, at'aha ja kuichu chubá nga ch'atjó chon.

¹⁶As'ai xi t'ijnasun nintiu kichaha tsatekoho ni xi t'íntje asuntee ko j'áya chahan.

¹⁷Ninku xi síjña ndjiojmi ján ta tsitju kj'ai ntítsje xi ta y'a nku kichá yjo. ¹⁸Ko nahan chje ta tsitju kj'ai ntítsje xi batéxumaha nd'íu. Kui xi 'yún kinchja nga b'i kitsúhu xi y'a kichá yjo:

—Kichá yjohi t'ichákj'ákohoni éhen tuntsjajé xi t'ín asuntee, at'aha ja chubaha nga stí tuntsjajé.

¹⁹As'ai kichaha ntítsjee tsatekoho tuntsjajé xi t'ín asuntee ko kits'ínkj'a má nga ts'íonnki tuu, kui xi tsuhu ra má nga s'ejña chji kjuakjan chánkaha Ntíaná. ²⁰Kits'ionnkí tuntsjajé natsihin nankiu, tunga tu jníhi kitju. Xi nkú ra ma nku metru masen kama nga nankaha jnú ko jan ra unchan kilometru kama nga tayáha.

B'i ts'ín tsakuchj'íhi Jua yatu ntítsje xi incha y'a kjuanimá xi fekuhu

15 As'ai kieke ndjiojmi ján kj'ai ni chánka xi ma nkjunná, xi tsakúchji ni xi kama. Yatu ntítsje kieke xi incha y'a yatu kjuanimá xi fekuhu. B'a ts'ín kuichú ma ndjuúhu kjuakjan chánkaha Ntíaná xi t'ib'ejña chji.

²Kieke nku ni xi b'a t'ín nku ntáchak'un chutsín xi nd'í kin'etjijinkoho t'ín. Ko andaihi ntáchak'uun t'íncha ndju xuta xi kits'ín nganaha chu. Kui xi Najmi kits'íntsjohó sénnistjihin ko najmi kits'ínkj'áihin nga kis'et'aha xki j'áihin chu. Incha y'a xuto najní arpa xi Ntíaná kitsjáha. ³T'íncha se sohon Moise, nda xi kits'ínxát'aha Ntíaná, ko ta t'íncha se sohon Chutsankó. B'i t'íncha tsu:

Ji Ntiani, ji t'íhin nga'yún.

Chánka ni xi kin'endai ko ma nkjúnni.

Kixi ko naxu niyá xi ts'i.

Ji xi nda reihí xuta xi tjín.

⁴Ngayjee xuta tjíhin nga tsankjúhin, Ntiani.

Ngayjee xuta tjíhin nga ts'íintsjohi.

At'aha nku tutu ji xi tsjei.

Kj'uaí nginkuin ngayjee xuta xi tjín nga ts'íintsjohi,

at'aha ja ya nga kixi n'ei kjuá.

⁵Nk'ie nga ja kama ni xu'bi, kikié nga tsix'á nínku, ante nkjúhun Ntiana xi síjña ndjiojmi ján. ⁶Tsitju nínku yatu ntítsje xi incha y'a kjuanimó. Incha yja najyun xi je ko xi tibat'ai ko 'mehe tjíntukjáha ni s'ekjá toonsine. ⁷As'ai nku xi ŋju xi tjíntu tík'uun kitsjáha nga nkúnkú ntítsje xi yatuú nku tasa toonsine xi kitsehe ni xi ts'ín nibájennehe xuta. Kui xi kjuakjan chánkaha Ntiana, Ntiana xi tjíña tík'un tu nkjéhe ni. ⁸Kitsehe aya nínku ninti xi tsitjújihin kjuachánkaha ko nga'yúhun Ntiana, ko ndaha nku najmi kama jas'en aya nínku santa nkúhu nga jeya kjuanima xi yatuú xi incha y'a ntítsje xi yatuú.

B'i ts'ín tsakuchjíhi Jua kjuanima xi yatuú

16 As'ai kint'e nku nta xi tu xí 'yúhún xi nibaha aya nínku. B'i kitsúhu ntítsje xi yatu maha:

—Tankiún. Tqatendzjosún asuntee ni xi tíncha tasa xi yatu xi kjuakjan chánkaha Ntiana.

²As'ai ntítsje xi tjuun ngjiténdzjosún asuntee ni xi tíncha tasaha. As'ai xuta xi tjíntut'áha chubaha chu ko xi kits'intsjohó sénnistjihin incha kingjahá tsé ch'onk'un xi kitsjáha kjuá'un.

³As'ai ntítsje xi ma johó tsaténdzjojín ntáchak'uun ni xi tíncha tasaha. As'ai jní kama ntáchak'uun xi nkúhu jníhi nku nda xi kan'ek'ien. K'ien ngayjee xi tjíntu tík'un ajin ntáchak'uun.

⁴As'ai ntítsje xi ma jahan tsaténdzjojín ntáje ko ajin ntá tixó ni xi tíncha tasaha. As'ai jní kama. ⁵Kint'e nga b'a kitsú ntítsje xi batéxumaha ntánijuo:

—Tsje ní ji, Ntia xi tjíña ko y'ejña. Kixi kuan'ei nga b'a ts'ín kuan'ei kjuá. ⁶At'aha kui xuta xu'bo incha tsaténdzjo jníhi xuta jee ko já profeta. Nd'ai ji kuak'aihi nga jní incha kuak'i. B'a ts'ín machjéhen.

⁷Ta kint'e nku xi b'i kitsú ajin naxan chje:

—Johon, Ntia xi tjíhin nga'yún, ji xi kixi ko naxu n'ei kjuá.

⁸As'ai ntítsje xi ma ŋjuhu tsaténdzjojnúhu ts'íu ni xi tíncha tasaha. Kik'aihi kjuá ts'íu nga nd'í k'uétikoho xuta. ⁹As'ai 'yún kits'inchjahan nubóo xuta. Ndaha tsa b'a kama, najmi incha ngjikj'áhá ra animaha ko najmi incha kits'ínkie yjohó nga Ntiana xi chánka. Tu sa ní najmi kikienkjún Ntiana nga kinchja. Ntiana, kui xi maha tsj kjuanima xu'bi.

¹⁰As'ai ntítsje xi ma uhun tsaténdzjo ni xi tíncha tasaha má tjíñasun chu nga tibatéxuma. As'ai kama jyun ngayjee má

tibatéxuma chu. Incha kikjinene njai xuta ngat'aha kjuu'un xi tfincha be. ¹¹Ch'on incha kitsúhu Ntíaná xi tijná nk'a ján tu ngat'aha kjuu'un xi tfincha be ko tsé xi incha kingjaha, tunga tu nkú najmi incha ngjik'áhá ra animaha.

¹²As'ai ntítsje xi ma juhun tsaténdzjojin ntáje chánka Eufrate ni xi tfincha tasaha. As'ai kixíya ntáje tu xi tsjantehe ra nga kj'ua já rei xi nibáha má tju ts'íu.

¹³As'ai kikié jan jáninda xi b'a k'un cháxkje k'un. Ts'a chuyatuku tsitju chu ko ts'a chu xi ma johu ko ts'a nda profeta tsank'óo. ¹⁴Kui jánindoo xi ts'in kjuankjún ko incha bitju nga nchja njaha já rei xi tjin ngayjee asuntee, tu xi k'uéndaha yjoho jóo xi má nga incha ts'in kjuachán. At'aha kjuachán chánka s'e nistjin nk'ie nga kuakúchji yjoho Ntíaná xi tjihin nga'yún.

¹⁵“Chasoo, an kjúa xi nkú joyaha nda ndyjé. ¡Nda tjin ts'e xi tijná tik'un ko xi tijná ndaha najyuhun tu xi najmi kjúátsú'ba kistihi ko najmi kama subaha ra nga cha!”

¹⁶Jáninda xi joon kinchja njakúhu já rei ante xi 'mi Armagedon nga én hebreo.

¹⁷As'ai ntítsje xi ma yatuhu tsaténdzjo ni xi tfincha tasaha. Kinu'yá nku nta xi tu xi 'yúhún. Aya ninku má b'ejña Ntíaná nga batéxuma nibaha nto nga b'i kitsú:

—Ja kama.

¹⁸Tsat'ai nd'ích'on, xaáhan kama, janeya ch'on, ko kama nku chón xi tu xi 'yúhún. Nkúhu nga tjinu xuta asuntee najmi kjee ma nku chón xi nkúhu xu'bo, at'aha tu xi 'yúhún kama chóon. ¹⁹Jan tsitju nanki chánkoo nga tsakjanya ko kin'ekje nanki xi tjin asuntee. J'áitsjehen Ntíaná nanki chánka Babilonia xi má nga kits'in nibánehe kjuakjan chánkaha. Kin'ek'i nanki Babilonia kjuakjahan Ntíaná. ²⁰Najmi ta kiyaha ra ngayjee xjo xi tjin ko ta ndaha naxiu. ²¹Nk'a ján nibaha ra ts'í ndjio i xi kik'anehe xuta. Ts'ati yachán kilu áhí niu. Én ch'on tsu kinchja xuta nga najmi kikienkjún Ntíaná ngat'aha kjuanimá xi ts'e ts'í ndjio, at'aha un nkjún incha kikiéhe ngat'aha kjuanimá chánka xu'bi.

B'i ts'in tsakuchjhi Jua xi nkú ts'in kin'ekokjuu naskóo

17 As'ai j'aisena nku ntítsje xi sijnajihin ntítsje xi yatuu, ntítsje xi incha y'a tasá xi yatuu. B'i kitsúna:

—Nibái. Kuakuchjhi xi nkú ts'in n'ekokjuu naská k'aku xi tijnasun ntáje chánkoo. ²Já rei xi tjin asuntee incha kikjantuko naskóo ko xuta xi tjinu asuntee ta incha kikjantuko no. B'a ts'in kindyjajihin ra xi nkú ts'inndyjajihin xuta nk'ie nga ma ch'i.

³As'ai j'aijinna Espirituhu Ntíaná ko ngjikona ntítsjee ante kixiu. Yo kikié nku tachjuún xi tjsuhun nku chu xi ni. Nkú ts'in

chubaha xuta, b'a ts'in tjit'aha chu nga kitsejnuhu. Tunga en xi najmi tibenkjuhun Ntiana tjit'aha. Yatu maha nintaku ko te maha ndjiaha. ⁴Nku najyun kuan ko ni yja no. Kitsejnuhu ra toonsine ko kj'ai kj'ai ndjio tsjo k'un. Kjiya ntsja nku tasa toonsine xi kitsehe ni xi najmi sasihin Ntiana ko ni xi si nginkun Ntiana, kui xi tsuhu ra kjuaska xi kits'in. ⁵Tjit'a stjen nku j'ain xi najmi chuba mankjihin xuta. B'i ts'in tjit'a: "Nanki chanka Babilonia." Kui xi naaha jminchjin ská ko naaha xuta xi ts'in ni xi najmi sasihin Ntiana. ⁶Kikie nga ch'i no. Jnhi xuta jehe Ntiana ko jnhi xuta xi kin'ek'ien ngat'aha nga kits'inkie yjoho nga Jesu yjanki, kui xi kits'in ch'ih. Nk'ie nga kikie no, tu ni xi kama nkjuhunna.

⁷As'ai b'a kitsuna ntitsjee:

—¿Á tíma nkjuhun ri? Xinyaha nkú tjihin ra ngat'a ts'e no ko chu xi jisuhun, xi yatu maha nintaku ko te maha ndjiaha. ⁸Chu xi kuayai, kui xi y'ejña nk'ie. Najmi ta tjihin nd'ai. Tunga kuitjunjih aya tixa nanko nga ngjuai má nga ndyja. Xuta xi najmi jintut'a j'áihin kintehe ni nga kamanda asuntee xujun xi má nga jintut'a j'áihin ngayjee xi k'úentu tik'un, kui xutaha incha kama nkjuhun nk'ie nga incha skué chu xi y'ejña nk'ie ko najmi ta tjihin nd'ai tunga kj'uai ngáha.

⁹Kui ni xu'bi xi machjehen kjuankjintak'un. Nintaku xi yatu, kui xi tsuhu ra asunntu tjenki xi yatu xi tjnasun no. ¹⁰Ta tsuhu ra yatu já rej. Un já rej xu'bi ja incha kits'inndyja, nku xi tjin saha xá nd'ai, ko nku xi najmi kjee f'ai. Kui xi najmi 'yún tse kamaha nk'ie nga kj'uai. ¹¹Chu xi y'ejña nk'ie ko najmi ta tjihin, kui xi nda rej xi ma jiu, xi ta nku xi yatu. As'ai ngjuai má nga ndyja.

¹²Ndjia te xi kuayai, kui xi tsuhu ra te já rej xi najmi kjee 'bai xaha, tunga k'uai xaha ra nga kuatexumako chu nku ora tjihin.

¹³Kui xi nkúhú incha kamako xinkjin ko tsaha chu nga'yuhun ko xá xi tjihin. ¹⁴Incha kjaanko Chutsanko, tunga ts'ín nganahá Chutsanko, at'aha kui xi Nda Ntaha já ntia ko Nda rejhi já rej. Incha tjennkihi Chutsanko xuta xi kinchaha Ntiana ko j'áihin, xi kixi incha kits'intjusun ni xi kitsuhu Ntiana.

¹⁵Ko b'a ta kitsú yana ntitsjee:

—Ntáje xi kuayai má nga tjnasun naskoo, xutaha niu. Tu mí ntjehé ni y'ahara, tu mí éhén ni ko tu mí nankihí ni. ¹⁶Ndjia xi te xi kuayai xi tjihin chu, kui xi incha ts'ín unkie naskoo. Incha kj'aha ngayjee ni xi tjihin ko k'uejña kisti. Kjine yjonintehe no ko nd'i incha k'uetikoho. ¹⁷At'aha Ntiana y'ejña ajin animaha ndjia xi tee xi má nga incha ts'ín ni xi mjehe Ntiana. Kui nga nkúhú incha ts'ín maha yjoho ko incha tsaha chu nga kui xi kuatexuma santa nkúhú nga kuitjusun en xi kitsú Ntiana. ¹⁸Na xi kuayai, kui nanki chanka xi batexumaha já rej xi tjin asuntee.

**B'i ts'ín tsakuchjǐhi Jua nga kin'ekje
nanki chánka Babilonia**

18 Nk'ie nga ja kama ni xu'bi, as'ai kieke kj'ai ntítsje xi nibajehen ndjiojmi ján. Kui xi chánka xá xi tjǐhin. Kjuachánka xi tjǐhin kits'ín ndzjehen asuntee. ²Yún kinchja nga b'i kitsú:

—Ja kuan'ekje. Ja kuan'ekje nanki chánka Babilonia. Ja ni'yaha jánindo kama, ante má tjíntuyá ngayjee jáninda xi tjín. Ja nubaha ngayjee nise xi uncha ko xi si nginkun Ntiana. ³Ajihin nanki xingisoo nku naská kama nanki Babilonia. Xi nkúhu tsa kik'i jóo kjuaskáha no nga kikjantuko. Já rei xi tjín asuntee incha kikjantuko no, ko kama nchiná já tiyanta xi tjín ngat'aha ni nkjún xi ts'atse nga tsjo ts'ín y'ejña.

⁴As'ai kint'e kj'ai nta xi nibaha ndjiojmi ján xi b'i kitsú:

—Títjusojiun nankiu, jun xi xuta xi ts'an, tu xi najmi ko jun ch'anjikohonu ngatitsuhun ko tu xi najmi chakohonu kjuanimá xi sakúhu. ⁵At'aha santaha ndjiojmi ján ja tǐbichú ngatitsuhun. Ja tjínjin k'un Ntiana já xi tǐncha ts'ín.

⁶N'ek'íechjǐú ni xi kits'íhin xuta. Jo tjǐhin nga n'ek'íechjǐú ngatitsuhun. Tinchajihuun tasaha ni xi k'úi, xi jo niyá nga 'yún kjan sa nga xi kitsjáha xi kj'ai. ⁷Xi nkú ts'ín 'yún nk'a ts'asje yjoho ko tsjo ts'ín y'ejña, b'a ta ts'ín 'yún tjohon kjuanimá ko kjuaba nd'ai. At'aha b'a tǐtsu nga kui rú nku na reina, najmi na x'an rú ko rú najmi s'ehe kjuaba. ⁸Kui kjuaha nkuhú nga nibane tentehe ra kjuanimá, ngabaya, kjuaba ko kjintía. Nd'í s'etíkoho, at'aha tjǐhin nga'yún Ntiana xi ts'ínkokjuaha.

⁹Ni xi tjǐhin naská Babilonia já rei xi tjín asuntee kits'ínchjénko no ko jóo incha kikjantuko no. Kui nga nk'ie nga incha skuehe jóo nǐntǐ xi tǐbitju má nga tǐti nankiu, incha kjintát'a ko un kama k'un. ¹⁰Kjin kuincha, at'aha incha tsankjún kjua'un xi tǐ'baihi nankiu ko b'a incha kuitsú:

—iNimá rú ts'íhin! iNimá rú ts'íhin nanki chánko, nanki Babilonia xi nk'a tjen! At'aha nkuhú nga n'ekokjuaha.

¹¹Játiyanta xi tjín asuntee ta kjintát'a ko un skuehe ngat'aha ni xi tímaha nankiu, at'aha najmi ta tjín xi k'uatsehe ra ch'á xi k'juaíko.

¹²At'aha toonsine ko toontaba, nkjin tǐkjá ndjio tsjo k'un ko nkjin tǐkjá najyun chjǐ, najyun kuan ko xi nihi, nkjin tǐkjá yá xi sinje ko nkjin tǐkjá ni xi kin'endakoho yá xi chjǐ ko kǐcha ko kj'ai sa nihi xi tjín, ¹³nkjin tǐkjá ni xi sinje ko ntá sinje, tjink'úbjo ko xán, seti, kuan niñu xi chjǐ ko tuniñu, turu ko chutsanka, ndje ko yá xi kje'yún ndje, ko santaha xuta musu xi satéña, kui niu xi incha f'aiko jóo.

¹⁴B'a k'uíhin nanki Babilonia:

—Ja najmi ta tjihin ri tu tsjo k'un xi kama mje nkjihin! Ja kuan'endya kjin ni tsjo k'un xi tjihin ko kjuanchinahi! Najmi ta sakú saha ri!

¹⁵Kjin incha kuincha já tiyanta xi incha kama nchinántjaihi nankiu, at'aha incha tsankjún kjua'un xi skuehe nankiu. Incha kjintá ko un skuehe ngat'aha ni xi tímaha nankiu ¹⁶nga b'a incha kuitsu:

—Nima rú ts'ihin! Nima rú ts'ihin nanki chánkoo! Kui xi kingja najyun chji xi kuan ko xi ni, najyun xi yajnuhu toonsine ko kja'á kja'á ndjio tsjo k'un. ¹⁷Nkuhú nga kfehe ngayjee kjuanchiná chánka xu'bi.

Nkjin incha kuincha ngayjee já xi ts'ínko yábarku, xi yá barku incha b'emayá, xi ts'ínxáya yábarku ko ngayjee xi ntáchak'uun sakúhura ni xi incha kjine. ¹⁸Nk'ie nga incha skue ninti xi tbitju má nga títi nankiu, 'yún incha kuinchja nga b'a incha kuitsu:

—Má nankihi xi b'a ta tjin xi nkú tjin nanki chánkoo?

¹⁹Incha kuaté'a ndyjo nintaku nga kuakúchji nga kjuaba tjihin, incha kjintá ko un skuehe ngat'aha ni xi tímaha nankiu nga b'i incha kuitsu:

—Nima rú ts'ihin! Nima rú ts'ihin nanki chánkoo! 'Yún ts'atse ni xi chji. Yo kama nchiná ngayjee xi tjihin yábarku. Tu nkuhú nga kuan'ekjehe ngayjee ni xi tjihin.

²⁰Kat'etsjonuu, jun xi tintsuboo ndjiojmi ján ngat'aha ni xi tín'ehe nanki chánkoo. Kat'etsjonuu, jun xuta jehe Ntíaná ko já postru ko já profeta, at'aha Ntíaná kuats'ínkokjuá nankiu ngat'aha ni xi kits'innuu.

²¹As'ai nku ntitsje xi nk'a tjen kikjesintjen nku ndjio naxi áí. Kui xi kikjaníkj'ajin ntáchak'uun nga b'i kitsú:

—B'i ts'ín 'yún n'ekje nanki chánka Babilonia ko najmi ta ch'a skuehe ra. ²²Najmi ta kuinú'yáha aya niyátéhe nga kjuane najni arpa ko yanaxu ko tjio. Yo najmi ta s'ehe já xi ts'ínnda nkjin tjká ni. Yo najmi ta kuinú'yáha nga kuakjan tuniñu. ²³Najmi ta ts'ín ndzjehen ndaha nku nd'í aya niyátéhe ko najmi ta kuinú'yáha s'í kjuabixan. B'a kama ta ndaha tsa já tiyanta xi tjin yo kama já k'aku ajihin xuta xi tjin ko tje xi maha ts'anachakoho ra ngayjee naxinantá xi tjin.

²⁴At'aha kui nankiu y'anji jníhi já profeta, jníhi xuta jehe Ntíaná ko ngayjee xi kin'ek'ien asuntee.

B'i ts'ín tsakuchjhi Jua nga kin'etsjoho Ntíaná ndjiojmi ján

19 Nk'ie nga ja kama ni xu'bi, as'ai kint'e ntaha nkjin nkjún xuta xi 'yún kinchja ndjiojmi ján nga b'i incha kitsú:

—Kan'etsjoho Ntíaná, kui xi ts'ínk'ankiná!

Kui xi ts'e kjuachánka ko nga'yún.

²At'aha nda ts'ín ko kixi ts'ín kjuá,

ja kuats'ínkòkjua naská k'aku
xi ni najmi ndaha kits'ínkatsúnkoho xuta.
Ntíaná ja kuakasje chjí jníhi xuta xi ts'e.

³As'ai b'ahá ta incha kitsú ngáha:

—¡Kan'etsjoho Ntíaná! Ninti xi títbijuhu nanki chánkoo ngjuainji nk'a ján tu nkjéhé ni.

⁴As'ai kingjénsten santaha t'anankiu jáchá xi kan ñjuu ko xi ñju xi tjíntu tík'uun nga kits'íntsjoho Ntíaná, kui xi tjñasun ante má batéxuma. B'i incha kitsú:

—¡B'a katuma! ¡Kan'etsjoho Ntíaná!

⁵As'ai kinu'yá nku nta xi nibaha ra má b'ejña Ntíaná nga b'i kitsú:
N'etsjoho Ntíaná ngayjo jun xi xuta xi ts'e,
jun xi yankjún Ntíaná, xi xixihi ko xi ihi.

⁶As'ai kint'e nga xi nkú ts'ín nu'yá nkjin ntaha xuta, xi nkú ts'ín faneya ntáje nga ma 'yún ko xi nkú ts'ín 'yún faneya ch'on. B'i kitsú ntó:

—¡Kan'etsjoho Ntíaná!

At'aha tibatéxuma Ntíaná, Ntia xi tjíhin nga'yún.

⁷Kat'etsjoná ko katsejíninná kjuatsjo,
n'ekie yjoná nga kui xi chánka.

At'aha ja kuichu chuba kjuabixahan Chutsanko,
ja kab'énda yjoho xi k'úejñako.

⁸Ka'baihi nga ngjuu najyun xi chjí,
xi je ko xi tibat'ai.

Kui niu xi tsuhu ra ni xi nda incha kits'ín xuta jehe Ntíaná. ⁹As'ai b'a kitsúna ntítsjee:

—T'et'ai ni xu'bi: “¡Á b'a nda tjíhin ts'e xi kik'inyaha ra nga kj'uaíhi s'i kjuabixahan Chutsanko!”

Ko b'a ta kitsúna:

—Kjuaxi ni xi tixihin. Ntíaná xi b'a kitsú.

¹⁰As'ai tsásinkúnch'int'aha ntítsjee xi má nga ts'intsjoho, tunga b'ahá kitsúna:

—Najmi b'a tu n'ei. An ta ts'inxát'aha Ntíaná xi nkúhu ji ko ta xi nkúhu já nts'ei xi tu nkú tíma 'yún tak'uhún én xi tsakúya Jesu. Ntíanáhá xi n'etsjoihi.

At'aha én xi tsakúya Jesu, kui éen xi ts'ínkinchjaha já profeta.

B'i ts'ín tsakuchjíhi Jua nku xi tjísuhun ndje

¹¹As'ai kieke nga tjentixa nk'a ján. Tsase ko kieke nku ndje taba. Xi tjísuhun chu 'mi Xi Kixi Ts'ín ko Xi Kjuaxi Ni xi Tsu. Kixi ts'ín nk'ie nga kjuu ts'ín ko nga kján. ¹²Xi tíncha nd'í tíncha tunkun. Nkjin corona tjí'aha ko tjít'aha nku j'áin xi nku tutu kui be. ¹³Yja nku najyun xi kits'ihí jní ko j'áihin, kui xi Éhen Ntíaná. ¹⁴Tjennkihí já jun

xi tjin ndjiojmi jan. Ndje taba tjintusuhun nga yja najyun xi chji, xi taba ko je.

¹⁵Ts'a tibitju nku kichq xi yjo, tu xi kjaankoho nanki xi tjin asuntee. Ndjá kuatexumaha xuta ko ts'in nibanehe kjuakjan chankaha Ntiana xi tihin nga'yun. ¹⁶Najyun xi yja ko ngasuhu tjit'a j'ain xu'bi: "Nda reihí já reí ko Nda Ntiāhā já ntiā."

¹⁷As'ai kkie nku ntitsje xi sjnasun ts'lu. Kui xi 'yun kinchja nga b'i kitsuhu ngayjee nise xi b'ema tjen nk'a jan:

—Nibá ma ñjakú nga chinoo nichine chanka xi tsjá Ntiana.

¹⁸Chinoo yjonintehe já reí ko já jun k'aku ko já xi x'in b'asje yjoho, yjoho ndje ko xi b'esuhun chu, yjonintehe ngayjee xuta, xi tjima ndaíhi ko xi kich'atse, xi ihí ko xi xixíhi.

¹⁹As'ai kkie chu xi tsitjulin ntachak'uun ko já reí xi tjin asuntee nga tjenko já juhun. Incha kama ñjakú tu xi incha kjaankoho xi tjsuhun ndje ko já jun xi ts'e xi tjsuhun ndje. ²⁰Kichjubénijé chí ko tá kichjubénijé nda profeta tsank'á xi kits'in kjuankjun nginkun chí. Kui kjuankjun xi kits'in ts'anachakoho ra xuta xi kitsjante nga kis'et'aha chubaha chí ko xi kits'intsoho sennistihin. Incha kichjanik'ajin tik'un chí ko nda profeta tsank'oo ajin ntachak'un nd'i xi titikoho sufri. ²¹Ko já xingisoo kin'ek'ienkoho kichq xi tibitju ts'a xi tjsun ndje. Ngayjee nisee tu xi incha kikjinehé yjonintehe joo.

B'i ts'in tsakuchíhi Jua nga nku mií nú kj'ua

20 As'ai kkie nku ntitsje xi nibajehen ndjiojmi jan nga y'a yubíhi tixa nanko ko kjiya ntsja nku n'ukichq chanka.

²Jak'á chuyatuku ko y'et'a'yun nku mií nú tihin. Kui chuyatuku xi ye chá xi 'mi ndaninda ko Satana. ³Kikjanik'aya tixa nanko ko y'échja. Y'énehe nku sello xi y'échja'yun ankjuo tu xi najmi tá k'uanachaha ra nanki xi tjin asuntee santa nkúhu nga kj'ua nú xi nku miu. Askahan nk'ie nga ja kj'ua nú xi nku miu, tihin nga chjundaya kutju.

⁴As'ai kkie nkjin já xi y'entu nga kik'ai xaha nga incha kuatexuma. Tá kkie xuta xi kitikjá nintaku ngat'aha nga tu nkú kits'inkiehé yjoho nga Jesu yjanki ko y'énijmí éhen Ntiana. Kui xi najmi kits'intsoho chu ko sennistihin ko najmi kitsjante nga kis'et'aha stjen ko a ra ntsja chubaha chu. Incha j'áiya ngáha ra ngabayoo ko tsatexumako Jesucristo nku mií nú tihin. ⁵Tunga xuta k'ien xingisoo najmi j'áiyaha ngabayoo santa nkúhu nga j'a nú xi nku miu. Xi kuatexumako Jesucristo, kui xi tjun kj'uaíyaha. ⁶J'á b'a nda tihin ts'e xuta je xi k'uaihi ra nga tjun kj'uaíyaha! Ngabaya xi ma joho najmi tá tihin ra nga'yun tsa nkú ts'íhín xuta xu'bo. Tu sa ní ts'intsoho Ntiana ko Jesucristo xi nkúhu já na'mi ko kuatexumako nku mií nú tihin.

B'i ts'ín tsakuchjíhi Jua nga ts'ínndyja ndanindoo

⁷Nk'ie nga ja kj'ua nú xi nku miu, chjündáya ndanindoo má kjiya'yún. ⁸As'ai kuitju nga k'uanachaha xi batéxumaha nanki Gog kō nanki Magog, kui xi tsuhu ra tu má nankihí ni. Ndanindoo kuinchja njakúhu já jun xi tjíhin nankiu nga incha kjaán. Nkjin kama xi nkú ts'ín nkjin maha tsumí xi tjín andai ntáchak'uun.

⁹Incha k'úema ngayjee asuntee kō k'uétjindaihi má tjíntu xuta jehe Ntíaná kō nanki xi Ntíaná tjoho. Tunga nibahá nd'í nk'a ján xi kj'uaík'íétiyjehe. ¹⁰Kō ndanindoo xi ts'anachaha jóo chjanikj'ajin ntáchak'un xi tjíhin nd'í kō sufri, má ta chjanikj'ajin chu kō nda profeta tsank'óo. Yo un skuehe nistjin nistjen tu nkjéhé nihi.

B'i ts'ín tsakuchjíhi Jua nga n'ekokjua xuta

¹¹As'ai kikié xi tibatéxuma. Taba kō chánka ante má nga tjíña nga batéxuma. As'ai t'anankiu kō nk'oo incha ngji t'axín nginkun. Najmi ta kis'ehe ra ante. ¹²Kikié xuta xi k'ien, xi ihí kō xi xixihí, nk'ie nga kabincha nginkun xi tibatéxumoo. As'ai kichjux'á nkjin xujun kō ta kichjux'á xujun xi má nga tjíntut'á j'áihín xuta xi k'úentu tík'un. Xi nkú ts'ín jtít'a xujun ni xi incha kits'ín, b'a ts'ín kin'ekokjua xuta k'ien.

¹³J'áiya ngáha ra xuta xi k'ienjin ntáchak'uun kō xi kjintuyánji t'anankiu, ngayjee xi tjíntu antehé xuta k'ien. Xi nkú nga incha kits'ín, b'a ts'ín incha kin'ekokjua. ¹⁴As'ai kichjanikj'ajin xi 'mi Ngabaya kō xi 'mi Antehé Xuta K'ien ajin ntáchak'un nd'íu. Ngabaya xi ma joho ntáchak'un nd'íu. ¹⁵Xi najmi tjíntut'á j'áihín xujun má nga tjíntut'á j'áihín xuta xi k'úentu tík'uun, kui xi ta kichjanikj'ajin ntáchak'un nd'íu.

B'i ts'ín tsakuchjíhi Jua nku nk'a tsetse kō nku t'ananki tsetse

21 As'ai kikié nku nk'a tsetse kō nku t'ananki tsetse, at'aha kindyjajin sén nk'a xi tjuun kō t'ananki xi tjuun, kō najmi ta kis'ehe ntáchak'un. ²Kō kikié nanki Jerusalen tsetse. Kui xi nanki jehe Ntíaná xi Ntíaná kits'ín nibájen ndjiojmi ján. B'a ts'ín kas'enda xi nkúhu nku nabixan xi tsjo tjín x'ótji xi kan'engja nga tókuyaha nda bixoon.

³Kint'e nku nta xi 'yún xi nibaha má tjíña xi tibatéxumoo nga b'i kitsú:

—Ntíaná ja tjíñajihín xuta nd'ai. K'úéñajihín xuta kō kui xi kama xutaha. Ntíaná k'úéñajihín kō kama Ntíaha. ⁴Ts'ínxijnu ntánkun. Najmi ta incha kuayáha kō najmi ta incha kjintáha. Najmi ta kjintáyaha ngat'aha kjuaboō kō najmi ta un skuehe ra. At'aha ni xi kis'e ja najmi ta tjíhin.

⁵As'ai b'a kitsú xi tibatéxumoo:

—An títs'in tsetse ngayjee ni xi tjín.

Ko b'a ta kitsú:

—T'et'ai ni xu'bi, at'aha kjuaxi én xu'bi ko ma n'e s'ejin.

⁶As'ai b'a kitsúna:

—Ja kama. An xi ntu alfa ko ntu omega, an xi tjuun ko xi fekuu.

Xi tíma xintáha an tsjahá nga k'úi ntánijuaha ntá tixa xi ts'ínk'íentu tík'uhun xuta. Tu tsjahá ra. ⁷Xi ts'ín ngana, kui xi ts'ínkjáihin ngayjee ni xu'bi. An kama Ntíaha ko kui kama ntína. ⁸Tunga máha xi tsankjún ko xi najmi s'ejihin, xi ts'ín ni xi najmi sasínna ko xi ts'ínk'ien animá, xi chuba fantukohó xinkjín ko xi ts'ín tje, xi benkjún ntia xi ts'índaha ntsja xuta ko ngayjee xi nchja én tsank'á, kui xi tjihin nga ngjuai ajin ntáchak'un xi nd'í ko sufri títikoho. Kui xi ngabaya xi ma joho.

B'i ts'ín tsakuchíhi Jua Jerusalen tsetse

⁹As'ai j'aisena nku ntítsje xi síjñajihin ntítsje xi yatuu, ntítsje xi incha y'a yatu tasa má nga tíncha kjuanimá yatu xi fekuhu. Kui xi b'a kitsúna:

—Nibái. Kuakuchíhi nabixan xi kama chjuúhun Chutsanko.

¹⁰As'ai j'aijínna Espiritu ko ngjikona ntítsjee nku asunntu tjenki chánka xi 'yún nk'a. Yo tsakúna nanki Jerusalen, kui xi nanki jehe Ntíaná xi Ntíaná títs'in nibájen ndjiojmi ján. ¹¹Nd'íhi kjuachánkaha Ntíaná títs'in kat'aihi nankiu xi nkú joyaha ndjio tsjo k'un chjí, xi nkú joyaha nku ndjio jaspe xi taba xi nkúhu nch'án taba. ¹²Tjítjindaihi nankiu nku xjó chánka ko nk'a xi te jo maha ankjuaha. Nkúnkú ankjuo tínchasti nkúnkú ntítsje ko tjíntut'áha ankjuo j'áihin ntjehe xuta Israel xi te jo maha. ¹³Jan maha ankjuo xi yja má tju ts'ú ko jan yja má xi tjehe fintjai ts'ú ko jan yja nku ngatehe ko jan yja ngate xinkuu. ¹⁴Te jo maha tuts'in xjóho nankiu. Nga nkúnkú tjíntut'á j'áihin já postru xi te joho Chutsanko.

¹⁵Ntítsje xi tínchakona y'a nku yáchuba toonsine xi k'ua chubakoho nankiu, ankjuaha ko xjóho. ¹⁶Nkuhú chuba y'a nankiu. Nga ndjuhu ko nga tayáha tu nkuhú chuba y'a. Yáchubaha ntítsjee ts'achubakoho nankiu. Jo mi ko jo unchan kilometru kama. Nga ndjuhu ko nga tayáha ko nga nk'aha tu nkuhú chuba. ¹⁷As'ai ta ts'achuba xjóho. Cháte ko tj'ion metru kama. Chuba xi ts'ínchjén xuta, ta kui xi kits'ínchjén ntítsjee.

¹⁸Ndjio tsjo k'un jaspe kamandakoho xjó ko toonsine xi tu xí ndahá kamandakoho nankiu. 'Na xi nkúhu chutsín. ¹⁹Ngayje tákjá ndjio tsjo k'un chjí tjíntut'á tsjoho tuts'in xjóho nankiu, jaspe xi tjuun, zafiro xi ma joho, agata xi ma jahan, esmeralda xi ma ñjuhu, ²⁰onice xi ma uhun, cornalina xi ma juhun, crisolito xi ma yatuhu, berilo xi

ma jihin, topacio xi ma ñjaha, crisoprasa xi ma tehe, jacinto xi ma te nkuhu, ko amatista xi ma te joho. ²¹Ankjuo xi te joo, te jo perla tjihin. Nkuhú ndjiō tso k'un perla kamandakoho nga nkúnkú ankjuo. Ko toonsine xi nda kamandakoho niyáté k'akuhu nankiu. 'Na xi nkúhu chutsín.

²²Najmi kieke ninku nankiu, at'aha Chutsanko ko Ntiana, Ntia xi tjihin nga'yún, kui xi ninkuhu nankiu. ²³Najmi machjéhen nankiu tsa ts'ú ts'ín ndzjehen ko tsa sóo, at'aha nd'íhi kjuachánkaha Ntiana títs'ín ndzjehen ko Chutsanko xi nd'íhi nankiu. ²⁴Xuta naxinantá xi tjín asuntee incha k'úema má ndzjehen nankiu ko incha kj'uaíko yo kjuanchináha já rei xi tjín asuntee. ²⁵Najmi s'echja ankjuaha nankiu nga nistjiun, ko najmi s'e nistjen. ²⁶Yo n'ekjas'en kjuanchináha ko ni tso k'un xi tjihin nanki xi tjín asuntee. ²⁷Tunga ndahá nku ni xi si nginkun Ntiana najmi kjuas'en yo, ta ndaha xuta xi ts'ín ni xi najmi sasíhin Ntiana, ko ta ndaha xi nchja én tsank'á. Tu nkuhú xuta xi tjíntut'á j'áíhin xujuhun Chutsanko, yo má nga tjíntut'á j'áíhin xuta xi k'úentu tík'uun, kui xi kama kjuas'en yo.

B'i ts'ín tsakuchjíhi Jua ntá xi ts'ínk'íentu tík'uhun xuta

22 As'ai tsakúna ntítsjee nku ntáje xi tjihin ntánijua xi ts'ínk'íentu tík'uhun xuta. Kui xi tibat'ai xi nkúhu nch'án taba. Má b'entu Ntiana ko Chutsanko nga batéxuma, yo tíbitjuhu ntóo. ²Kamasehen niyáté k'akuhu nankiu ko xki andaihi ntáje tíncha yá tu xi ts'ínk'íentu tík'uhun xuta. Nk'ie nga nku nú te jo niyá bjaha tu. Xki sá bjaha tu. Xkaha yóo mahá ts'ínnkihi xuta naxinantá xi tjín asuntee.

³Najmi ta s'ehe ni xi najmi nda kinchjane Ntiana. K'úéñajihin Ntiana ko Chutsanko nankiu nga kuatéxumaha ko xuta xi ts'e incha ts'íintsjoho. ⁴Incha kama kuase'a Ntiana ko stjen s'et'a j'áíhin. ⁵Najmi ta s'ehe nistjen. Najmi ta kamachjéhen ra nd'í xi ts'ín ndzjehen xuta xi k'úentu yo ko ta ndaha ts'ú, at'aha Ntiana ts'ín ndzjehen. Tu nkjéhe ni incha kuatéxuma xuta xu'bo.

B'i ts'ín tsakuchjíhi Jua nk'ie nga ja ma kj'uaíhi Jesu

⁶As'ai b'a kitsúna ntítsjee:

—Kjuaxi én xu'bi ko ma n'e s'ejin. Ntiana, Ntia xi kits'ínkinchja já profeta, kui xi kuats'ín nibá ntítsjehe, tu xi kuakúchjhi ra xuta xi ts'e ni xi tjihin nga kama xatí.

⁷—Kjúái xatí! Já b'a nda tjihin ts'e xi títs'íntjusuhun én xi jtít'a xujun xu'bi, xujun xi títsuya ni xi tjihin nga kama!

⁸An Jua kint'e ko kieke ni xu'bi. Askahan nga ja kint'e ko kieke, tsásínkúch'int'aha ntítsje xi tsakúna niu nga kits'intsjoho. ⁹Tunga b'ahá kitsúna:

—Najmi b'a tu n'ei. An xi ta ts'inxát'ahá Ntíaná xi nkúhu ji ko xi nkúhu já nts'ei xi já profeta ko ngayjee xi títs'íntjusun én xi tjt'a xujuin. Ntíanáhá xi n'etsjoihi.

¹⁰Ko b'a ta kitsúna:

—Najmi tu ch'atjó 'mai én xi kits'ínkjas'ehin Jesucristo xi tjt'a xujuin. At'ahá ja tábichú tiña nístjin nga kuitjusun niu. ¹¹Xi ts'ín ni xi najmi nda, tu nkú kats'íhín ni najmi nda. Xi ch'onk'un, tu nkú kats'íhín ni ch'onk'uhun. Xi nda, tu nkú kats'íhín ni xi ndahá. Ko xi je, tu nkú katuma jehé.

¹²—Johon, kjúái xatía. Kjúáikoho chji xi tsjahá nga nkúnkú xuta xi nkú nga incha kits'ín. ¹³An xi ntu alfa ko ntu omega. An nga tuts'ihin ni ko nga fekuhu. An xi tjuhun ko xi fekuhu.

¹⁴¡Á b'a nda tjihin ts'e xuta xi tibanéhe najyuhun tu xi ts'ínkjáihin ra tuhu yá xi ts'ínk'íéntu tík'uhun xuta ko tu xi kama kjuas'eheh ankuahá nankiu! ¹⁵Natsin ján kuincha xuta xi ch'onk'uun, xi ts'ín tj'e, xi chubá fantukohó xinkjín, xi ts'ínk'ien animá, xi benkjún ntia xi ts'índaha ntsja xuta, ko ngayjee xi tsjoho ko nchja én tsank'á.

¹⁶—An Jesu títs'in nibá ntítsjena tu xi kuitsuyahá ra xuta ninku ni xu'bi. An nts'én xi nibáha ra kjamahá David, an xi ntjehe David, ko an niñu chánka xi ts'ín ndzjen nga ja tífi ma seen.

¹⁷B'a títsu Espiritu ko chjuúhun Chutsanko:

—¡Nibái!

Xi tibasínñjuhu b'a ta katsú:

—¡Nibái!

Xi tíma xintáha, kanibá. Xi mjehe, tu katakj'áhá ntánijua xi ts'ínk'íéntu tík'uhun xuta.

B'i ts'ín fekuhu xujun xu'bi

¹⁸An b'a tíxihin xuta xi tibasínñjuhu én xi tjt'a xujun xu'bi xi títsuya ni xi tjihin nga kama: Tsa tjín xi k'uésuhun én xi tjt'a ei, Ntíaná k'uésuhun xuta xi b'a ts'íiun kjuanimá xi tjt'a xujuin. ¹⁹Tsa tjín xi kjéxin én xi tjt'a xujuin xi títsuya ni xi tjihin nga kama, Ntíaná kjéxihin xuta xi b'a ts'íiun tu xi k'uáihí, tu xi tsjá yá xi ts'ínk'íéntu tík'uhun xuta, ko ta kjéxihin ante xi k'uáihí xuta xu'bo nanki jehe Ntíaná xi tjt'a xujuin.

²⁰Xi t'béjña chji ni xu'bi b'i títsu:

—Johon, kjúái xatía.

¡B'a katuma! ¡Nibái, Nda Ntia Jesu!

²¹Ngatentoo kas'enuu kjuandaha Nda Ntíaná Jesu. B'a katuma.